

كلمات عبد الناصر فى القوات المسلحة غير المنشورة أثناء زيارته للجبهة^(١)

أ- كلمة عبد الناصر فى عملية تدريب عسكرى للقوات المسلحة

٥ مارس ١٩٦٨

إن هذه أول مرة ألتقى فيها بالقوات المسلحة بعد ٥ يونيو، وإن أهم ما يمثله لنا ذلك اليوم أن يصبح تجربة ودرساً نستفيد منه.

إن علينا جميعاً أن نتعلم كيف نموت فى سبيل الهدف، وأن ندرك بالإيمان أن كل أجل له قدر. إن تجارب غيرنا حافلة بكل ما يمكن أن يكون مفيداً لنا، وفى هوى فى فيتنام فإن خمسمائة جندى من الثوار واصلوا المقاومة شهراً فى قلعة هوى القديمة، وقاموا بمعجزة عسكرية أساسها إرادة المقاومة. إن الجهود السياسية لحل الأزمة لم تصل حتى الآن الى نتيجة، وهناك قوى كثيرة تطلب إذلالنا ولكن جماهير الشعب كله صممت على الوقوف، وصممت على رفض الهزيمة، وصممت على تحقيق آمالها. إن الوطن كله يعتمد عليكم، ويثق فى مقدرتكم على تحرير الأرض العربية والدفاع عن كرامة العرب.



عبد الناصر مع جنود القوات المسلحة على الجبهة ١٩٦٨/٢/٢٨

(١) كلمات عبد الناصر فى القوات المسلحة المنشورة، خطب وتصريحات الرئيس جمال عبد الناصر، ج ١، ص ٤٠٣.
- أنظر أيضاً www.nasser.org.

ب- كلمة عبد الناصر في ضباط الفرقة السابعة المشاه

فى ١٠ مارس ١٩٦٨

كل سنة وأنتم طيبين..

بعد انتهاء المرحلة الدفاعية وإعادة تجهيز القوات المسلحة كان من الضروري أن أشوفكم، وبمناسبة العيد كانت طيبة أنى أشوفكم.. أطمئنكم فى نفس الوقت.

الشعب كله والبلد كلها بتتظر اليكم وبتتظر منكم عمل كبير، والواجب الملقى على القوات المسلحة واجب صعب ولكن مش مستحيل؛ بالإرادة والتصميم تستطيع القوات المسلحة فى الوقت المناسب إنها تحقق هذا الواجب.

حينما نتكلم عن الحرية، أول واجب يلقى على عاتقكم وهو تحرير أرضنا من الإحتلال، ويرضه بدى أقول حاجة إن احنا خسرنا.. كنت باتكلم مع قائد الجيش فى الطريق عن معارك ٥ يونيو - كان قائد فرقة فى هذا الوقت - رغم الإشتباك يوم ٦، ٥ كانت الخسائر بسيطة. وكنت باتكلم مع قائد الفرقة المدرعة - كان قائد لواء فى هذا الوقت - اللواء بتاعه دمر ٥٤ دبابة اسرائيلية؛ ماجاتناش فرصة نقاتل اسرائيل وجها لوجه.

خسرنا معركة ٥ يونيو، ولكن مفيش جيش فى العالم خسر كل معاركه أو كسب كل معاركه، لا تعتبر ٥ يونيو آخر المطاف. رغم ما حدث لنا من ٥ - ٨ يونيو، فإن إرادة وتصميم شعبنا يتطلب أن نحول الهزيمة فى المعركة الى نصر بعون الله.. بتصميمنا وبجهودكم.

عدونا له ١٠ سنين يعمل ويستنى هذا اليوم، واستراتيجية اسرائيل دائما معروفة؛ فرض الصلح بالقوة، والنهارده بيعتقدوا إن عندهم الفرصة لفرض الصلح بالقوة؛ وهذا معناه إنهم يملوا علينا شروط ونحن بنقبل، ليه؟ لأنهم احتلوا جزء من أرضنا.

عادة الحروب.. عندما تنتهى الحرب بنهاية إرادة دولة، تستسلم وتفاوض علشان تنتهى الحرب وتتصالح، احنا ماانتهيناش علشان نتصالح.

النهارده الوضع بيختلف عن ٨ يونيو.. يوم ٨ يونيو ما كانش عندنا شئ، اليوم عندنا ما يجعلنا ندافع ضد العدو والذى وصل للضفة الشرقية. طبعا الحصول على هذه الأسلحة والمعدات والعربات وهذا يحتاج الى أموال واتفاقيات.. الإتحاد السوفييتى عاوننا فى ذلك.

لم نكتفى بذلك، وعندنا وعد من الإتحاد السوفييتى بالرد على طلباتنا. باتكلم فى هذا الموضوع علشان أفسر موضوع آخر وهو قرار مجلس الأمن.

كان من اللازم ألا نرفض القرار ونسير فى طريق الحل السلمى، وكان من الطبيعى أن نصل به الى شئ مشرف غير مهين، وفى الوقت نفسه نجهز أنفسنا ونستعد. يمكن نعوز وقت أطول لنستعد ونجهز أنفسنا، ولا يمكن أن نتورط فى أى معركة إلا إذا كنا على ثقة كاملة من استعدادنا وتدريبنا وقوادنا وسيطرتنا على قواتنا؛ لنسيطر على معركة ننتصر فيها لأنها حاسمة فى مستقبل أمتنا والعرب جميعا.

الولايات المتحدة الأمريكية من الواضح أنها تساند إسرائيل بالمال والسلاح والتأييد في الأمم المتحدة، وكذلك بكل الوسائل؛ لتحقيق ما ترغب فيه إسرائيل وهو عدم انسحاب قواتها من مواقعها الى ما قبل ٥ يونيو .

وبهذا أثرت على الأمم المتحدة، وبهذا صدر قرار الأمم المتحدة.. وهو قرار غير كاف. أقول لكم هذا علشان تعرفوا إن عدونا وراه قوة تمده بالسلاح، وأمريكا أمدت إسرائيل بطائرات. الضغوط علينا كثيرة، ولكن استطعنا أن نصمد.. وسنصمد.

بالنسبة للجبهة الداخلية فهي قوية ومتينة، وبالنسبة للمظاهرات التي حصلت في الأسبوع الماضي، هذا الشباب المنفعل لازم نقدر انفعاله لأن كل واحد فيكم منفعل، لما بيروح البيت بيلقى عيلته منفعله؛ وهذا سوف لا ينتهى إلا بطرد العدو الاسرائيلى.

زى ما قلت قبل كده: ما أخذ بالقوة لا يسترد بغير القوة.

إحنا بنتكلم على الحلول السلمية، ونحن لا نقبل الإذلال بأى حال، وسنصمد حتى نشعر بقوتنا ثم نحرر الأرض العربية من الإحتلال.

الأمة العربية والشعب كلها تحملكم هذا الواجب والمسؤولية، ولذلك فالقوات المسلحة مسؤولة وعليها واجب كبير وصعب؛ وهذا يستدعى أنها تشتغل وتتعب وتبذل الجهد الكبير.

شوفنا أعدائنا يتقنوا النواحي العلمية؛ ولذلك لابد أن نتفوق عليهم، ولابد أن نعرف كيف نعامل الجنود ونكسب ثقتهم.

عاملين أساسيين..

العلاقة بين الضباط والجنود.. لأن الجندى إن شعر أن الضابط أخوه، وأن الضابط بيدور على مصلحته، وأن يشعر أن الضابط ليس من طبقة وهو من طبقة.

النقطة الثانية التوجيه المعنوى.. لابد أن توجهه الوجهة الدينية؛ لابد أن نعرف أن لكل أجل كتاب. وإذا أمن بأن عمره سوف لا يزيد يوم أو ينقص يوم وأنه سيموت فى اليوم المحدد فإنه يكتسب شجاعة، وما هى المهمة الأساسية وهى الحرية؛ أن نحرر الوطن من الإحتلال والضغط.

بهذا نستطيع فعلا أن نبني القوات المسلحة على أسس صحيحة.

لا بد أن نتعب فى التدريب، لنا ٤ سنين لم نندرب.. تستحملوا البعد عن بيوتكم المدة الصعبة دى؛ ربما ٦ أشهر ربما ١٠ أشهر ربما سنة ولكنها قطعاً سوف لا تدوم، لكن لازم نؤدى مهمتنا ثم بعد ذلك نعود الى أوضاعنا الطبيعية.

وهم فى سيناء، ويتحدونا كل ساعة محاولين استفزازنا، وكان تصريح رابين الأخير الذى يقول فيه: إنه إما مفاوضات أو يقعد ٢٠ سنة.. مين اللى يخليه ميقعدش ٢٠ سنة؟ احنا.. المقصود أنتم يارجال القوات المسلحة بشجاعتكم.

إحنا علينا نوفر لكم متطلباتكم من تدريب وأسلحة وغيرها حتى نتفوق على عدونا، وأنتم عليكم الكفاح والنضال والعمل من أجل الحرية، وتحرير سيناء وتحرير أرضنا من العدو الصهيونى.

المسؤولية مسؤولية كبيرة.. مسؤوليتكم أنتم يارجال القوات المسلحة.

نرجو الله أن يوفقكم ويوفقنا جميعا فى تحقيق هذه المسؤولية حتى نحرر أراضينا، ونصبر على تحقيق قدراتنا.

وربنا يوفقكم ويوفق بلدنا والسلام عليكم.



عبد الناصر يتحدث الى جنوده على جبهة قناة السويس

ج- كلمة عبدالناصر فى الفرقة الثانية المشاة

فبراير ١٩٦٩

كل سنة وأنتم طبيين..

الناس بيقلوا إن احنا طولنا.. لغاية دلوقتى بقالنا ٢٠ شهر ساكتين على احتلال سيناء، أنا معرفش إنتم طبعاً بتقولوا إيه. هو من واجبنا.. واجب القوات المسلحة إنها تحمى الوطن، النهارده واجبنا بعد احتلال جزء من أرض الوطن إن احنا نحرر هذا الجزء المحتل.

أنا بشوفكم النهارده فى هذه المناسبة، ولكن هى فرصة علشان أقولكم إن كل الكلام على الحلول السلمية والحلول السياسية.. الى آخر هذا الموضوع، إحنا ماكنش عندنا أمل فيه من أول يوم؛ لأن من الواضح أن استراتيجية إسرائيل مبنية على فرض الصلح، طبعاً فرض الصلح يعنى فرض شروط الصلح الللى هى عايزاها، وهى انتصرت فى معركة عسكرية، ولكن حتى الآن لم تستطع أن تفرض شروط الصلح. فإذا لن يمكن أن تقبل بأى حل إلا إذا فرضت شروطها وقبلنا شروطها.

الناحية الثانية.. إن أمريكا وكل دول الاستعمار العالمى تؤيد إسرائيل، فإذا ليس أماننا إلا الحل الطبيعى والحل الوحيد وهو القتال من أجل تحرير الأرض ومن أجل تحرير البلد، وهذا شئ مش جديد لا علينا ولا على الللى سبقونا. ربنا قال: كتب عليكم القتال وهو كره لكم، واحنا كتب علينا هذا القتال وليس أماننا الحقيقة - حتى أنتم كقواتنا المسلحة وإحنا كمسؤولين - ليس علينا حتى نرفع رؤوسنا وأى واحد فينا يرفع رأسه، إلا إن احنا نضحى بكل شئ فى سبيل تحرير الأرض. الحقيقة فى ال ٢٠ شهر الللى فاتم؛ وإحنا كنا بنحسب إن احنا عايزين وقت علشان استعادة التسليح، عايزين وقت علشان نعوض الللى ضاع منا، عايزين وقت علشان نتدرب، عايزين وقت علشان حاجات كثيرة جدا.

وعلى هذا سرنا فى الحل السلمى، وأيضاً كنا بنقول: إن احنا مش عايزين الحرب من أجل الحرب.. محدش فى الدنيا بيعوز الحرب من أجل الحرب، ولكن عدونا هو عدو شرس، وبيدافع عن قضية مصمم عليها فى نفس الوقت. إحنا أيضاً لازم نكون شرسين، ويجب أن نفهم قضيتنا. الحقيقة قضية حقنا فى الحياة.. حقنا فى أرضنا.. حقنا فى بلدنا ثم الدفاع عن أبنائنا والدفاع عن وطننا.. ده حقنا. الحقيقة النهارده إذا لم تكون على درجة من القوة لن يقتصر الأمر على ما تم، ولكن كلنا نعلم أن إسرائيل تتنادى بأن حدودها تمتد من النيل الى الفرات، وهم مشبو فى هذا خطوة خطوة واستطاعوا إنهم يحققوا هذا الموقف. إحنا يمكن مكناش على مستوى التفكير بهذا الشكل، ولكن يجب النهارده أن نكون على مستوى بحيث إن احنا نفكر أن إسرائيل أيضاً تريد أن تحقق أهدافها.. هدف وراء هدف.

الللى أنا عايز أقوله لكم النهارده علشان تعرفوا المهمة الملقات على عاتقكم: إن فى رأى إن مفيش أمل فى الحل السلمى.. ده الللى شايفه النهارده. ولكن لما نكون على درجة من القوة وعدونا يعرف هذه القوة؛ ممكن إننا نصل الى حل، لأن إذا شعر إن احنا نستطيع أن نضربه، يبقى ممكن يتخلى عن شروطه بدون معركة عسكرية. ولكن حتى الآن العدو بهذه القوة؛ إذا ليس لنا إلا إن احنا نجهز نفسنا كل واحد من أجل المعركة.

النهارده بعد ٢٠ شهر ماينقدرش نقول إن احنا حنستنى كمان ٢٠ شهر أو حتى حنستنى ١٥ شهر، ولكن لازم نكون عارفين إن احنا بعد ٢٠ شهر؛ بعد ما عوضنا جزء كبير من معدائنا بل زدنا عليها، والجزء الآخر اللي احنا عاوزينه كله فى طريقه الينا - المعروف طبعا إن الحاجة العسكرية لا تنتهى وليس لها نهاية - بعد كده لازم الحقيقة بناخذ المبادء الهجومية فى كل تصرفنا. العدو بإستمرار كان بيتجه الى الهجوم، إحنا لازم حتى فى دفاعنا.. يجب أن دفاعنا يكون دفاع هجومى، ويجب أن كل واحد فينا بينتظره وبيجهز نفسه وبيجهز عساكره لليوم اللي بيصدر فيه الأمر.. إن احنا نعدى الى سينا، ونحارب معركة التحرير. هذا اليوم أت لا ريب فيه، ولا نستطيع إن احنا ننتظر مدة طويلة جدا وبلادنا تترزح تحت الاحتلال اليهودى.. الاحتلال الصهيونى. ده يستدعى من كل واحد من الضباط ومن الجنود الاهتمام الى أقصى درجة بالتدريب؛ لأن العدو اللي قدامنا عدو مدرب.. عدو مايبعتدش على الهليكوبتر أو على الدبابة.. لا بالعكس. إحنا عندنا أحسن دبابة فى العالم اللي هى ت ٥٥، وهو دخل حارب بالشيرمان، بال IMX وبالباتون. إحنا ال ٥٥ أحسن، ومع هذا هو نتيجة تدريبه الجيد كانت الطلقة تضرب فى الدبابة.

إحنا عايزين نصل الى هذا، وأى إهمال فى الحقيقة فى التدريب معناه إن احنا سنعوق من المرحلة القادمة. الحقيقة التدريب الصعب.. التدريب الشاق يسهل لنا الحرب.. يسهل لنا فى المعركة، وإحنا يمكن ما احناش واخدين على الانقطاع بهذا الشكل، ولكن يجب علينا فى الحقيقة فى الفترة القليلة القادمة حتى نعبر القتال، إن احنا نضيع كل وقتنا فى التدريب، وفى توثيق العلاقة بين العسكرى والضابط، والعسكرى لازم يشعر أن الضابط هو أخوه.. هو اللي بيحل له كل مشاكله الخاصة وكل مشاكله العامة؛ وعلى هذا الأساس يكون هناك جيش متلاحم مترابط. كلنا أيضا نعلم أن جيش اسرائيل.. العلاقة بين العسكرى والضابط علاقة قوية جدا.. التدريب العسكرى؛ أقل عسكرى فى جيش اسرائيل مدرب ٣٠ شهر.. أقل واحد أو أكثر من كده. وعلى هذا الأساس لازم الحقيقة نقدر القوات المواجهة لينا.. القوات المعادية، ولا طبعا نضخم فى قوتها، وفى نفس الوقت لا نستهن بقوتها، فى نفس الوقت نستعد لمقابلة هذا العدو.

مضى ٢٠ شهر.. مش حنستنى تانى ٢٠ شهر.. لازم فى هذه السنة إن شاء الله نعبر ونقاتل من أجل تحرير الأرض المحتلة، وهذا هو الواجب الكبير الملقى على عائق القوات المسلحة.. القوات المسلحة عملت.. لإيه عملت؟ لهذا الواجب. الحقيقة العشرين شهر اللي فاتوا كانوا من أصعب الأيام اللي مرت على شعبنا.. اللي مرت على بلدنا.. اللي مرت على وطننا وعائلاتنا وأبنائنا وإخواننا؛ لأن عشرين شهر تحت الاحتلال.. واحتلال مين؟ إحتلال يهودى.. احتلال اسرائيلى.

وإحنا كنا بنشتغل الحقيقة فى السنين اللي فاتت من أجل هذه المعركة، وجبنا كل شئ.. كل ما طلب جنبناه؛ دبابات جنبناها، طائرات جنبناها، المدفعية جنبناها.. كل المعدات، صرفنا مئات الملايين من الجنيهات، ولكن الحقيقة المعدات مش حتحارب لوحدها. المعدة حتحارب بالعسكرى.. المدفع المضاد للدبابات بيضربه العسكرى.. إذا المدفع.. أحسن مدفع مضاد للدبابات عليه عسكرى غير مدرب لن يعطينا أى نتيجة.

وأنا الحقيقة باقول هذا الكلام على أساس إنكم بتعرفوا إن إيه الواجب الملقى عليكم، وعلى أساس إنكم بتعرفوا أد إيه البلد تعتمد عليكم، ويمكن الأمة العربية كلها تعتمد عليكم من أجل تحرير الأرض. الحقيقة هذه الأرض، حتى لو مكنتش فيه معدات ولو مكنتش جاءتنا دبابات ولا أسلحة، كان لا بد علينا إن

احنا حنحارب بالبندقية لو دعا الأمر الى إن احنا نحارب بالبندقية والمدفع المضاد للدبابات أو القاذف المضاد للدبابات؛ زى ما بيحاربوا فى فيتنام.. بيحاربوا بالبندقية والرشاش والمضاد للدبابات، لا عندهم دبابة، لا عندهم طائرة، لا عندهم أى عربيات.. ما عندهم حاجة واستطاعوا بهذا لأن فيه روح القتال، فيه التدريب.. استطاعوا إنهم يجبروا الأمريكان أن ينسحبوا من أكبر قاعدة فيها طائرات ودبابات.. اللي هى قاعدة خيسانه. طبعا إحنا مش أقل من الفيتناميين، وإحنا مش أقل من الكوريين، وإحنا مش أقل من اليهود.

وأنا شفت فى سنة ١٩٤٨ إن العسكرى بتاعنا أجدع من العسكرى اليهودى، ولن أتصور أبدا إن العسكرى اليهودى أجدع من العسكرى بتاعنا.. العملية هى تدريب. أنا شفت العسكرى بتاعنا بيطلع وراء اليهودى السلك.. بيطلع وراء، العسكرى اليهودى بيحربى والعسكرى المصرى بيحربى وراء، لدرجة أنه طلع وراء السلك بتاع الموقع الدفاعى. واللى كان موجودين هنا من ٤٨ يعرفوا هذه المعارك.. معركة ١٦ أكتوبر فى ٤٨ عندنا فى عراق المنشية؛ فلن أتصور العسكرى اليهودى ده لا يقهر.. بالعكس.

وذعروا العساكر.. ذعروا فى حرب ٦٧ أما كانوا بيشفوا أى قوة مصرية متحركة، ولكن ظروفنا كانت فى سنة ٦٧ كانت ظروف سيئة الحقيقة؛ لأن احنا ما حاربناش.. لم نواجه اليهود. وبعد ما راحت قواتنا الجوية أصبحنا فى عملية انسحاب، وهم اصطادونا الحقيقة فى عملية الانسحاب، ضخموا جدا انتصارهم ولكن هذا الانتصار ليس بهذه الضخامة.

وأنا بأقول: إن العسكرى المصرى قادر وعنده الصبر والصلابة، ويستطيع فى الحقيقة مع التدريب إنه يفهم قضيتة، إنه يعمل عمل كبير ويموت من أجل القضية.. ويموت من أجل الهدف، واحنا مش أقل من الناس اللي بتموت من أجل قضيتها ومن أجل أهدافها.

الحقيقة إن احنا بالنسبة للطيران، يعنى بنعمل طيران النهارده على أساس إنه يكون طيران قوى متعدد فى الأنواع، بالنسبة للدفاع الجوى بنعمل على إنه يكون دفاع قوى، بالنسبة للمعدات بنعمل على أن تكون عندكم أحدث المعدات، بالنسبة لخفة الحركة بنعمل على إن قواتنا تكون قوات خفيفة الحركة. ولكن برضه بأقول: الموضوع مش هو الدبابة ولا المدفع ولا كذا.. الموضوع هو الإنسان.. الإنسان اللي بيوقف على الدبابة واللى يقف على المدفع واللى يقف فى الأرض ويصمم على أنه يقف فى الأرض.

الحقيقة بأقول لكم هذا الكلام حتى لا تخدعوا باللى حيطلع فى الجرائد فى المستقبل على مباحثات الدول الكبرى والحل السلمى؛ كل ده - أنا فى رأيي - لن يوصلنا الى نتيجة لأن أمريكا لا زالت تساند اسرائيل، ولا زالت تصر على أن لا يمكن عمل شئ إلا بموافقة الأطراف؛ ومعنى هذا أن اسرائيل لها حق الاعتراض على أى شئ، فاسرائيل لن يمكن إنها تتسحب من أرضنا. وحتى لو زعماء اسرائيل اقتنعوا لن يستطيعوا - إنهم تعهدوا قصد اليهود وقصد اسرائيل فى تعهدات كبيرة - لن يستطيعوا إنهم يمشوا من هذه الأرض إلا اذا وقعنا معهم اتفاقية صلح يملوا فيها الشروط.

إذاً المعركة آتية والمعركة حتمية، واللى بيقرر هذه المعركة - بالاضافة الى السلاح وبالاضافة الى القيادة الحقيقية - قدرة العسكرى فى التدريب، وروح القتال عند الفرد الضابط والعسكرى؛ وده الحقيقة اللي احنا عايزينه. مضى عشرين شهر وفاضل أشهر قليلة، وحيجيى اليوم اللي نقول فيه إن احنا حانعدى الضفة الشرقية. محدش حايرجع أبدا الى الضفة الغربية، لازم الحقيقة أرضنا مش ممكن بقى نسيبها مرتين. سبناها سنة ٦٧، والدور ده لازم بإذن الله نننصر فى هذه المعركة؛ وعلى هذا فلا بد إن احنا نتحمل

المشقة.. مشقة التدريب، المشقة في العمل. لابد إن احنا نربط بين العسكى والضابط ونحل مشاكل كل واحد، لابد إن احنا بالروح المعنوية وروح القتال تكون في السماء، لابد إن احنا نكون على ثقة من إن احنا نستطيع إن احنا نهزم القوات الاسرائيلية والعسكى الاسرائيلى.. الحقيقة ده اللى مطلوب منكم.

مطلوب منى أنا بجيبلكم الأسلحة والمعدات، وجبنا الأسلحة والمعدات بعد كل اللى راح، وبنجيب أسلحة ومعدات، وبنوفر لقواتنا وقواتنا الجوية والأرضية وقواتنا البحرية كل شئ. الحقيقة بنتعب فترة قليلة وبعد كده بنستريح بعد ما تخلص اسرائيل.. بعد ما نخلص أرضنا، بعد ما نحررها يبقى عندنا الوقت الكافى اللى احنا نقدر ننقل فيه الحقيقة الى حالة سلمية. بعدين اللى أنا بدى أقوله إن اليهود مش معتمدين على إنهم انتصروا فى سنة ١٩٦٧؛ هم عارفين إن احنا بنتدرب، إحنا بنجيب قوات.. همه بيتدربوا ويمكن تدريبات.. أنا باقول: مازالوا لغاية دلوقتى هم متفوقين فى نواحى، ولهذا الفترة الجاية لازم إحنا نتفوق فى كل هذه النواحى.. يعنى زى ما باقول - زى ما قلت - كل التدريب ده الآخر بيطلع.. هل المدفعية اللى فى الدبابه حيضرب دبابة العدو من أول طلقة ولا لأ؟ إذا ماضربهاش من أول طلقة أو التانى ضربها من أول طلقة تبقى المعركة راحت! هل العسكى اللى واقف على المدفع المضاد للدبابات حيضرب الدبابه من أول طلقة ولا لأ؟ هم مجهزين القناصة فى الدبابات، ومجهزين فى كل حته قناصة علشان يضربونا من أول طلقة.

هم عملوا فينا فى سنة ٦٧، إذا احنا لازم نفهم الأساليب اللى اتعملت ونتعلم منها زى الألمان ما عملوا فى أوروبا فى الحرب العالمية الثانية وناس تعلمت منهم، ثم بعد كده استطاعوا إنهم يهزموهم. والحقيقة لازم كل واحد يؤمن بهدفه، ويؤمن ببلده، ويؤمن بأن القوات المسلحة لابد لها أن تقوم بواجبها فى الدفاع.. فى تحرير الأرض، وإن احنا كقوات مسلحة لابد إن احنا نعمل عمل لنسترد أرضنا، سمعتنا، وإسمنا فى داخل هذه البلد. وإحنا كقوات مسلحة هذه البلد بتاعتنا.. هى بلد الضباط وبلد العساكر مهياش بلد الإقطاع ولا بلد رأس المال ولا بلد الإستغلال.

باقول أخيرا إن المعركة حتمية.. كل واحد فيكم لازم يتصرف على إن المعركة حتمية، وكل واحد فيكم لازم يتصرف على إن حيبجى اليوم اللى حنروح فى شرق القنال علشان نهزم القوات المعتدية.. القوات المحتلة لبلدنا. إذا لم نهزم هذه القوات المعتدية والقوات المحتلة فهى حتيجى وحتعدى القتال وتحتل بلدنا، وتعاملنا كما عاملت الفلسطينين اللى هم شردوا فى سنة ٤٧، ٤٨، ٤٩ وبعد هذا، واللى شردوا أيضاً فى ٦٧، بل إحنا النهارده كمصريين فينا لاجئين.. لاجئين من السويس، من الإسماعيلية ٣٠٠ ألف متوزعين فى البلد. الآن يانحيا حياة شريفة يانموت، وأنتم الناس اللى وضعت عليكم هذه المسؤولية، وقدركم هذا القدر.

الحقيقة يعنى هذه الفترة محدش يفكر فى نفسه.. محدش يفكر فى حاجة أبدا.. يعنى العملية إزاي الواحد.. يعنى هو إيه الفرق بين الشجاعة والجبين؟ إذا الواحد فكر فى نفسه هو يبقى على طول يفقد شجاعته، إذا الواحد فكر فى ربنا وإن مش حيصله حاجة إلا اذا كان مقدر له أن يحصله يمشى وسط الرصاص - فى وسط المدافع - مش حيصله حاجة.. يقولوا عليه ده جدع وشجاع. هذا الفرق بين الشجاعة والجبين.. مفيش حد حيعيش أكثر من اللى مكتوب له يوم.. مفيش حد لو نزلت جنبه عشرات الدانات هيموت ناقص عمر. ده موضوع إحنا كلنا كناس مؤمنين بيه وكبلا مؤمن نعرفه. فهذه المواضيع الحقيقة الواحد مايقلفش نفسه بها وبيتركها؛ يعنى المقدر فى هذا بيكون.. مقدر فى هذا هو اللى بيحصل، ولكن الواحد بيعمل ويصمم على أن ندخل المعركة إن شاء الله.

فى الحقيقة يعنى بعد أشهر قليلة لابد أن ندخل المعركة بعد ما قعدنا عشرين شهر، حنقعد نستنى هذه المحادثات شوية، حيثكلموا وبعدين المحادثات ديه مش حنتجح. هم الأمريكان مقترحين إن الدول الأربع تجتمع، وبعدين يطلعوا ببيان يساندوا بيه بعثة يارنج. طبعا ده كلام لا حيودى ولا يجيب؛ يبقى معناه تشجيعه الحقيقة لاسرائيل. أمريكا أيضا برغم الكلام اللى على نيكسون وكل الكلام اللى بنسمعه، لم تغير موقفها، ولن يستطيع أى رئيس أمريكى إنه يغير موقفه، وإذا أراد أن يغير موقفه فاحيغير فى حيز ضيق ويطئ. إذاً ليس أمامنا إلا أن نعتمد على أنفسنا، ولا يمكن إن احنا نحقق هدفنا ونحن نعتمد على أنفسنا إلا بالتضحية.

كل سنة وأنتم طيبين.. وأرجو السنة الجاية فى العيد زى النهارده أقابلكم وتتقابلوا وتهنوا بعض بالنصر وتحيرير الأرض.. ربنا يوفقكم.

والسلام عليكم.

د - كلمة عبد الناصر فى الفرقة ٤ مدرعة

فبراير ١٩٦٩

كل سنة وأنتم طيبين..

كنت عندكم هنا فى السنة اللى فاتت فى العيد الكبير.. ومر سنة واللى نرجوه - وكل الناس ترجوه - إنكم تكونوا فى السنة دى بذلتم جهد كبير جدا؛ بحيث إن احنا نصل الى المستوى فى التدريب واستخدام السلاح ونتفوق بيه على أعداءنا. الوقت اللى مر علينا من يونيه ٦٧ لغاية دلوقتى وقت طويل جدا - وهو أكثر من عشرين شهر - ومن الواضح إن مفيش حل سلمى، بل إحنا من أول يوم كنا نفهم إن مفيش حل سلمى، ولكن كان لابد إن احنا نسير فى هذا الطريق على أساس إنه طريق معقول اللى يمكننا فى نفس الوقت من إن احنا نبنى قواتنا المسلحة، ونجيب للفرق دبابات وعربات ومعدات.

ولكن من الواضح أن اسرائيل بعد أن حققت نصر كبير فى سنة ٦٧؛ طبعا هم انتابهم الغرور الى درجة كبيرة، ويعتقدوا إنهم يقدروا يحققوا أى حاجة، ويمكن بيستهينوا بينا.. بيستهينوا بقواتنا المسلحة وكل الدول العربية. وعلى هذا الأساس من الواضح أن اسرائيل لن تترك الأرض المحتلة إلا بالقوة، أو طبعا إلا اذا استسلمنا. ومن الواضح إن احنا مش هانستسلم؛ لأنه إذا استسلمنا معنى هذا إن احنا نقضى على كل شئ ببنينا، وكل أمل لنا فى المستقبل الى الأبد، ونقعد فى هذه المنطقة تحت رحمة اسرائيل وتحت رحمة الاستعمار. وإذا كنا عايزين نستسلم كنا استسلمنا يوم ٩.. يوم الهزيمة، ولكن رغم إن احنا فقدنا جزء كبير جدا من قواتنا المسلحة، ولكن شعبنا رفض بكل إصرار الهزيمة.

حصل لغاية دلوقتى إن اسرائيل استطاعت إنها تكسب المعركة العسكرية، ولكنها لم تتمكن أن تحقق أهدافها التى تريد بعد أن كسبت المعركة العسكرية. وعلى هذا الأساس فالواضح أنه سيكون هناك صراع آخر، ونحن بعد أن مضى علينا عشرين شهر بنبص للمستقبل ونقول: إن هذا الصراع مضى على حدوثه مدة طويلة زى ما ذكرنا فى المرة اللى فاتت.

النقطة اللى عايز أقولها الحقيقة: بعد ما جينا الأسلحة وبعد ما جينا العربيات وبعد ما جينا المعدات فلازم نتعب إحنا علشان نستخدم هذه الأسلحة؛ علشان كده بقولكم إيه اللى حصل السنة اللى فاتت منذ كنت فى زيارتكم فى العيد الكبير.

السنة اللى فاتت - لغاية دلوقتى مضت سنة - المفروض إن احنا نأخذ وقت علشان ندرّب فيه على استخدام السلاح بحيث إننا نتفوق على العسكرى الاسرائيلى. العسكرى الاسرائيلى هو عسكرى بيهتموا بتدريبه، عسكرى حسب اللى قيل فى المعركة اللى فاتت.. عسكرى شاطر فى ضرب النار، عسكرى شاطر والشطارة دى بتيجى من الاهتمام ومن التدريب.

إنتم فرقة مدرعة.. معروف إن الفرقة المدرعة بتحارب دبابات قصد دبابات، فلازم نوصل فى مستوى تدريبتنا الى أن الطلقة بتيجى فى دبابة. برضة هم عن المعركة اللى فاتت قالوا: إن هم كانوا بيصيبونا واحنا ماكانش بنصيبهم، وبيتباهوا جدا بهذا؛ فبناخد دروس مستفاده من المعركة اللى فاتت. بيقولوا: إن

هم مدربين أطقم من الرماة قناصة للدبابات علشان فى أول ما تبان الدبابات بتاعتنا، بيطلعوهم القناصة دول قدام علشان الواحد منهم بيضرب الطلقة بدبابة.

الدبابة بتاعتنا أحسن من دبابة اليهود.. الدبابة ت ٥٥ تعتبر أحسن دبابة فى العالم، ويعنى بتشتغل بالليل وتشتغل بالنهار. وإحنا من ناحية السلاح عندنا أحسن سلاح، وعازين استخدام هذا السلاح بحيث يتفوق الجندى المصرى على الجندى الاسرائيلى فى استخدام الدبابة وفى استخدام المدفع. بهذا الحقيقة نضمن إن احنا نستطيع أن ندخل المعركة وقلبنا مطمئن؛ لأن هذه المعركة ستكون معركة فاصلة.

وإحنا طبعا علشان هاندخل معركة لازم يكون عندنا تفوق جوى أو تعادل جوى.. يكون عندنا قوة جوية، تكون قوة جوية مدرية. وهم جاية لهم طيارات فانتوم، لكن اللي ثبت لغاية دلوقتى إن الطيارة الواحد وعشرين أيضا ضربت الطيارة الفانتوم. وهنجيب أسلحة أحدث.. الأسلحة الحديثة كلها متعاقدين عليها وهتوصل لنا فى وقت قريب.

إذاً احنا بنبص للعمل السياسى اللي ماشى، ده مش شغلنا إحنا كقوات مسلحة.. ده موضوع آخر. أما كقوات مسلحة، شغلكم هو العمل والتدريب المستمر والاستعداد للتفوق فى كل المجالات على عدونا اسرائيل؛ لأن احنا أراضيها محتلة، ولا بد هيجى اليوم اللي نقول فيه: لا بد من عبور القنال علشان نحرر الأرض المحتلة. فإذا مهما كان هناك كلام عن حل سلمى أو حل سياسى؛ ده لا يجعلنا بأى شكل من الأشكال إن احنا نتوانى أو نقصر فى أى ناحية من نواحي التدريب والصيانة أو أى شئ من هذه الأشياء؛ لأن المعركة حتمية.

اسرائيل بدأت بأنها لها وطن قومى صغير، ثم توسعت سنة ٤٨، ثم أرادت أن تتوسع سنة ٥٦ ماقدرتش، ثم جات لها الفرصة سنة ٦٧ لأن تتوسع؛ خصوصا وأن الولايات المتحدة الأمريكية لازالت حتى الآن - رغم تغيير الرئاسة، رغم الكلام اللي بينكتب فى الجرائد - لازالت حتى الآن تؤيد اسرائيل تأييد كامل. والولايات المتحدة الأمريكية بنقول: إن الدول الكبرى بتتباحث فى سبيل حل مشكلة الشرق الأوسط، ولكن لا يمكن فرض أى حل إلا بموافقة الأطراف المشتركة فى النزاع؛ بمعنى بموافقة اسرائيل. ده معناه إن اسرائيل لن توافق على أى شئ، واسرائيل لن توافق على الانسحاب من الأراضي المحتلة. اسرائيل بتصريحات قادتها كلهم أعلنوا وقالوا: إن الأرض المحتلة هيقدوا فيها؛ قالوا: إنهم حيقدوا فى شرم الشيخ، وقالوا: إنهم حيقدوا فى الضفة الغربية، وقالوا: إنهم حيقدوا فى الجولان، وقالوا: إنهم حيقدوا فى القدس.

الحقيقة بعد ٢٠ شهر من هزيمة يونيو سنة ٦٧، بيكون أن الأوان إن احنا بنتكلم على أساس أن المعركة - معركة التحرير.. معركة إسترداد الأرض بالقوة - آتية لا ريب فيها، وأن الوقت.. ماقدرش مثلا نعدى هذه السنة بدون ما ندخل هذه المعركة، يبقى قعدنا مدة أكثر من اللازم. طالما المعدات عندنا، وطالما الفرص عندنا، وطالما التدريب عندنا، وطالما الرجالة موجودين، لا بد إحنا نقوم بواجبنا كقوات مسلحة من أجل التحرير. علشان نتفوق على العسكرى الاسرائيلى، محتاجين الى التدريب ومحتاجين الى روح القتال. برضة باقول إن العسكرى الاسرائيلى مش هو العسكرى الذى لا يقهر، إحنا سنة ٦٧ لم نواجه العسكرى الاسرائيلى إلا مواجهات صغيرة، ويمكن قائد الفرقة هنا اشتبك مع - كان قائد لواء -

اشتبك مع قوات اسرائيلية فى المعركة، والاشتباك اللى حصل كانت قواتنا تستطيع إنها تبلى بلاءا حسنا. ولكن المعركة اللى جاية لازم حواجه فيها ونعدى مانع مائى وهتكون معركة كبيرة؛ فيجب علينا الحقيقة فى هذا إن احنا نتفوق، ويجب علينا إن احنا نؤمن بقضيتنا ونمى التدريب ونمى روح القتال.

قضيتنا مش عايزه كلام منى علشان أقنعكم بأن الواحد فيكم يؤمن بها.. العملية الأساسية هى بالإضافة الى قضية فلسطين - ونترك هذا جانبا - يعنى هناك أرض محتلة اللى هى أرضنا؛ اللى احنا حررناها من يمكن الاحتلال الانجليزى سنة ٥٦.. اللى هو قبل العدوان، ثم حاولوا يحتلوها بعد كده وفشلوا. والآن احتلت هذه الأرض، فالواجب الأول بعد كده إن احنا نحرر هذه الأرض، وإلا فاسرائيل لن تكفى بهذه الأرض وستنظر لاحتلال يمكن الدلتا؛ على أساس أن ملك اسرائيل يمتد من النيل الى الفرات.

روح القتال طبعا عملية مطلوبة، والقضية هى التى تبث القتال، فالواحد علشان الحقيقة يكون عنده روح القتال لازم يؤمن بحاجتين.. الإيمان بالله والإيمان بالوطن. وإحنا كشعب متدين المفروض إن احنا جميعا نؤمن بالله، ونؤمن إن كل واحد فينا فى هذه الحياة مش هيعيش أكثر من عمره يوم.. مش هيموت قبل عمره بيوم برضة. نصيحتى لكم وتقولوا لكل إخوانكم: حكاية الحرب.. كل واحد بيخاف مفيش حد مابيفش.. كل إنسان فى الدنيا بيبجى عليه وقت يخاف، ولكن الخوف له حدود.. هو مفيش حد مابيفش.. الخوف له حدود. أما موضوع الحياة والموت ده، فده موضوع بتاع ربنا ومحدث أبدا هيعيش أكثر من عمره. ولكن اللى أنا متصوره إن احنا لو كنا مندفعين فى عملنا ومهاجمين ويتكون خسائرننا أقل، واللى بان إحنا خسائرننا فى سنة ٦٧ كانت أكثر جدا من خسائر اسرائيل؛ اللى هم اندفعوا، واللى وصلوا لغاية هنا فى قتال السويس على ثلاث محاور.. خسائرنهم ما وصلتش الى ألف.

ده الحقيقة الكلام الأساسى اللى أنا عايز أقوله، وعايز أقول وأؤكد تانى إن المعركة لابد منها، وإن اسرائيل لن تسلم أبدا لا بقرار مجلس الأمن ولا بتنفيذ قرار مجلس الأمن، ولا بأى شئ. وبعد عشرين شهر من الانتظار، لا بد إن يبجى الوقت اللى احنا نتكلم فيه على المعركة. وبعد كده، إننى قد أعطى تصريحات للجرائد الأجنبية عن الحل السلمى وهذه الأمور، ومهما تكلمنا عن هذه المواضيع فدى مواضيع إنتم مالكوش دعوة بيها أبدا.. ماهواش شغلنكم أبدا. إن احنا نتكلم ده موضوع سياسة، إن احنا مش ممكن نقول إن احنا عايزين نحارب من أجل الحرب، وفعلا إحنا مش عايزين.. أنا مش عايز أحارب من أجل الحرب. إحنا إذا وجدنا حل سلمى إن اسرائيل تمشى من كل الأرض العربية المحتلة وبدون الحقيقة التنازل عن أى شبر وأوضاع مشرفة، إحنا بنقبل هذا الكلام. ولكن أنا على ثقة إن اسرائيل تريد اذلال العالم العربى وبالذات اذلال مصر؛ لأنها إذا ذلت مصر - اللى هى أقوى دولة عربية وأكبر دولة عربية - إنذل العالم العربى كله، وتكون فرضت وجودها فى هذه المنطقة.

وإنتم الحقيقة كفرقة مدرعة يكون عليكم واجب أساسى فى المعركة القادمة، وهذا الواجب الأساسى بيحتاج منكم العملية الأساسية.. القيادة والتدريب، وعلى قائد الفرقة إنه يتأكد أن السواق.. العملية إيه؟ ما هى الفرقة الأخر بتوصل الى سواق ومدفعجى، بدون سواق ومدفعجى مفيش حاجة! لازم الطلقة تكسر الدبابة اللى قدامك من أول طلقة، والسواق بيحطك فى الوضع الكويس اللى العدو مايقدرش يصطادك فيه. بهذا العمل الحقيقة تقدرنا نكونوا فعلا رأس الرمح بعد عمل رأس كوبرى فى الضفة الشرقية للقتال.

كل سنة وأنتم طيبين.. ونتمنى لكم النصر.. البلاد كلها بتبص لكم وعابزه تشوف اليوم اللي بتحققوا لها فيه أملها؛ بحيث أن كل واحد في البلاد يقدر يرفع رأسه، لأن طبعا الوقت اللي اليهود بتحتل بلدنا مابتقدرش أبدا نرفع رأسنا زي ما كنا رافعين رأسنا قبل كده.. وأتمنى لكم التوفيق.

والسلام عليكم ورحمة الله.



عبد الناصر مع جنود القوات المسلحة على الجبهة ١٩٦٨/٢/٢٨

هـ- كلمة عبد الناصر فى فرقة ١٦ مشاه

فبراير ١٩٦٩

كل سنة وأنتم طبيين..

وأنت بالصحة والسلامة يأنفندم..

بقى لنا عشرين شهر بعد قرار مجلس الأمن.. ولأبقى لنا دلوقتى عشرين شهر بعد العدوان؛ مدة طويلة بعد قرار مجلس الأمن؛ أكثر من سنة وثلاثة شهور. والحقيقة اللي قدامنا أن الأرض لن تسترد إلا بالقوة، وهذا الواجب تلقية البلد ويلقيه الشعب على عاتقكم. الكلام اللي فى الجرايد عن الحل السلمى.. الكلام اللي فى الإذاعة عن الحل السلمى هو كلام، لكن لغاية دلوقتى فى رأى مفيش حل سلمى مشرف. اليهود طبعا لن يقبلوا حل سلمى مشرف، ليه؟ لأنهم عايزين هذه المعركة بتكون الفاصلة، بيكسروا فيها رأسنا وبيمرغونا فى التراب؛ لهذا لا يمكن بأى حال إنهم يمشوا إلا بالحرب وبالقتال. فكل ما يذكر عن الحل السلمى لا تضعوه فى اعتباركم، كل ما يذكر عن المفاوضات بين الدول الأربعة الكبرى لا تضعوه فى اعتباركم. إنتم ناس عسكريين.. كل تصوراتكم لازم تكون فى العمل من أجل تحرير الأرض بالقوة.. بالحرب؛ لأن هى دى مسؤوليتكم.. مسؤولية كل فرد فيكم.

اليهود مش أرجل منكم، واليهود مش أحسن منكم، وإحنا فى سنة ٤٨ قابلنا اليهود وشفنا اليهود فى ميدان القتال، كان جيشنا صغير.. يعنى كنا يمكن ٩ كتائب. الوضع النهارده بيختلف.. فى يونيو كان عندهم كل المعدات اللي طلبها الجيش وأكثر، النهارده بنجيب لكم كل المعدات اللي عايزها الجيش بالنسبة للطيران، بالنسبة للقوات المسلحة. إذا حاكون الفيصل فى المعركة القادمة الضابط والعسكري.. الضابط الجدد اللي هو يقود العسكري وينتصر.

العمر ده بتاع رينا.. محدش عارف.. أنتم قاعدين هنا وإحنا قاعدين هنا، يمكن يضربوا قنبلة واحنا قاعدين بنتغدى.. وشفنا كده فى الحرب سنة ٤٨. فالواحد مايحسبش موضوع العمر ده وميفكرش فيه.. موضوع بنسبته بتاع رينا محدش حايعيش أكثر من عمره دقيقة، ولاحايموت قبل عمره دقيقة ولو حتى جت جنبه قنبلة هاون أو قنبلة طيارة. ولكن طبعا اللي بنحسبه هو بلدنا، والهزيمة اللي لحقت بنا فى يونيو ٦٧، والنصر الرخيص اللي خدوه اليهود؛ لأن احنا فعلا ماچاريناش.

الجيش ماچاريش؛ نتيجة إن مكش فيه قوات جوية.. نتيجة ضرب القوات الجوية الجيش صدرت له الأوامر بالانسحاب تانى يوم، والخسائر كلها راحت مننا فى الانسحاب؛ فالحقيقة هى قواتنا المسلحة انظلمت. يمكن برضه ماننشاش أن اليهود كانوا مدرين أحسن مننا، وكان عندهم روح هجومية، وكان عندهم إمكانيات تمكّنهم من أنهم يحققوا شئ، ولكن إحنا مجتث لنا الفرصة فى سنة ٦٧ علشان نحارب.

النهارده الحقيقة كتب علينا القتال.. لا بد أن نقاتل حتى نحرر الأرض.. أرض بلدنا، وبعد ما قعدنا عشرين شهر وصبرنا يبقى من الواضح إن احنا إن شاء الله لازم السنة دى ننهي احتلال أراضينا. كل المعدات اللي عايزينها بنجيبها.. الاتحاد السوفيتى إيدانا كل الأسلحة اللي موجودة، دى مدفعناش فيها فلوس.. مدفعناش ولا ملين، فيه جزء أخذناه مجانا، وفيه جزء أخذناه حن دفع ثمنه بالتقسيط. فى نفس الوقت بنجيب برضه أسلحة من أماكن أخرى، وبندفع على أد الفلوس اللي عندنا. ولكن نحن نهدف أيضا الى تقوية

قواتنا الجوية، مجرد ما نقوى قواتنا الجوية حتى نكون على ثقة حتى إن احنا متعادلين مع اسرائيل، منقدرش نستنى بعد كده يوم مع تكلمة معداتنا للعبور.

إذا انتم مطلوب منكم عدة أشياء..

أولاً: التدريب هو الأساس العسكرى: اليهودى اللى بيحاربك النهارده واخذ تدريب ٣٠ شهر على الأقل.. ٣٠ شهر! وبعد كده اللى فى الاحتياط - بعد الثلاثين شهر - بييجى كل سنة يتدرب شهر، وبيجيبوه كل شهر يتدرب يومين أو ثلاثة، ومتدربين وعارفين بعض والبلد كلها جيش، ولغاية دلوقتى مازالوا هما مجندين الرجاله والسئات.. البلد كلها جيش. إذا لازم نتدرب حتى نكون على مستوى أعلى من المستوى الاسرائيلى.

ده أهم شئ فى الحاجات اللى انتشرت عن المعارك. قالوا - اللى كتبوا عن هذه المعارك - حاجات عن الصفات اللى الحقيقة استطاعوا بيها إنهم يتغلّبوا علينا فى بعض المعارك الصغيرة. قالوا: فى الدبابات كان موجود قناصة.. الراجل اللى هو يضرب الطلقة تصيب الدبابة المعادية من أول طلقة، فى الوقت اللى احنا دبابتنا كانت تضرب طلقة وإثنين وثلاثة وأربعة متصيب الهدف. إذا لما نبتدى القتال يبقى لازم نصيب الدبابة من أول طلقة، وإذا قائد الفرقة المدرعة وقائد اللواء المدرع وقائد الكتيبة المدرعة يعرفوا إن فى الآخر بتوصل العملية للعسكرى اللى على المدفع بيضرب الدبابة، فإذا مكش العسكرى اللى على المدفع حيضرب الدبابة من أول طلقة، يبقى اليهودى حيضربك وحيسبقك؛ الحقيقة ده اللى احنا بنقصده بالتدريب.

النقطة الثانية: اللى هى روح القتال والروح الهجومية: هم متصورين إن احنا ناس معدناش روح قتال؛ ولذلك هم طمعانيين فينا، وكتبوا علينا كلام سيئ جدا فى الكتب اللى طلعت؛ فلانم الحقيقة نثبت.. وعندنا فرصة إن احنا نثبت إن احنا فى روح القتال أقوى منهم. وأثبتنا - برغم نتائج حرب ٤٨ - أثبتنا.. وأثبت العسكرى المصرى - اللى هو الفلاح اللى مكش يعرف يقرأ ولا يكتب اللى كان موجود معاينه - إن عنده روح قتال أكثر من العسكرى اليهودى. وأنا شفت العسكرى اليهودى بييجى، وحصل قتال متلاحم. هو العسكرى اليهودى هو العسكرى اليهودى، مانديش عدونا أولاً تقدير أكثر مما يستحقه، ولا ننزل فى قيمته، ونثق فى أنفسنا وبنقول: بالتدريب، وبروح القتال بنقدر نضرب العسكرى اليهودى، وبنقدر نضرب الجيش اليهودى. بعدين إحنا عندنا الحقيقة قضية النهارده أقوى من قضيتهم؛ عندنا قضيتنا اللى هى أرضنا المحتلة اللى هم خدوها، عندنا قضيتنا اللى هى احتلال القدس، عندنا قضيتنا اللى هى تعذيب العرب وحبسهم ومعاملتهم هذه المعاملة السيئة، عندنا قضية كبيرة جدا كل واحد فينا يحارب من أجلها.

بعدين عندنا النهارده فيه بقى عندنا لاجئين من السويس، فيه لاجئين من الإسماعيلية، فيه لاجئين - ٣٠٠ ألف لاجئ - موجودين وموزعين. فمعركتنا هى معركة فاصلة لابد فيها بإذن الله إن احنا ننتصر، إذا ما انتصرناش حيحولونا الى لاجئين زى ما حولوا الفلسطينيين قبل كده الى لاجئين؛ يعنى حيحولوا أهالينا وأولادنا، ويمكن يعاملونا مواطنين من الدرجة الثانية زى ما عاملوا الفلسطينيين.

هم كلامهم الواضح إن بلدهم بتمتد من النيل الى الفرات، يعنى لسه ليهم أطماع فى مصر أكثر من سينا. ديان قال من شهرين: "إن سينا دى مصر ليست لها فيها حقوق تاريخية ولا حقوق جغرافية، على هذا الأساس ليه نرجع سينا؟ ليه مصر عايزه ترجع سينا؟! ليس هناك أى داعى إنها ترجع سينا إلا إذا كانت عايزه تهاجم اسرائيل". وده بيبيّن طبعاً النوايا بالنسبة لاسرائيل تجاهنا.

إذاً الحقيقة إنا دلوقتي كبرنا القوات المسلحة، وزودنا عدد الفرق، بنكبر القوات الخاصة.. بنزود القوات الخاصة، بنكتر القوات الجوية.. بنزود القوات الجوية، وهدفنا أن يكون عندنا تفوق جوى، عملنا إجراءات، فى كل مكان تبقى المعركة الحقيقية أولاً وأخيراً متوقفة على الفرد.

كل الفلوس اللي طلبت للتسليح أعطيت.. الميزانية النهاردة واصله لأكثر من ٣٥٠ مليون جنيه للقوات المسلحة. بنحاول بكل الوسائل وعلى قدر امكانياتنا وأكثر إن احنا نوفر لكم امتيازات معينة؛ بحيث محدش يحس بمشاكل. الواجب بتاعكم الحقيقة تجاه وطنكم وشعبكم وأسركم؛ حنعدى القتال ولن نعود.. يعنى بنعدى القتال إنشاء الله مفيش حاجه اسمها بنرجع تانى غرب القتال، ومقدمناش غير أن نموت.

إنشاء الله رينا ينصركم وبينصر بلدكم، ومنتأثرش من اللي حصل فى سنة ٦٧؛ كل الشعوب قابلت أزمات، ولكن هذه الأزمات كانت ليها قوة.. كانت ليها من أسباب القوة، وقد تكون الأزمة اللي حصلت لينا سبب من أسباب قوتنا؛ بنغير حاجات كثير.. بنجدد حاجات كثير.. بنطور حاجات كثير.

بالنسبة لكم عايزين العلاقة بين الضابط والعسكري تتطور الحقيقة دائماً؛ بحيث العسكري يحس إن الضابط هو أخوه الكبير اللي خايف عليه. بدون ده الحقيقة لن نستطيع إن احنا نقود العساكر فى القتال، والعسكري يجيلك كضابط ويشكى لك مشاكله ومصالحه. وأنا قلت: إن احنا كل مشاكل العساكر نستطيع إن احنا نحلها، ففائة الفصائل لازم الحقيقة يشوفوا عساكرهم.. مشاكلهم العسكرية وأيضاً مشاكلهم المدنية.

إحنا مستعدين نحل للعساكر، وأنا قلت لوزير الحربية: أى مشكلة لأهله لأمه لأبوه لكذا؛ كل المشاكل إحنا مستعدين نحلها، مش عاوزين العسكري يبقى موجود فى الميدان وحاسس إن عنده مشكلة.. أى مشكلة عندنا القدرة إن احنا نحلها. الضابط الحقيقة.. الملازم قائد الفصيلة بإستمرار زى مايشوف أكل العسكري وحمام العسكري - ودى طبعا حاجات لازم نشوفها.. لازم نتأكد منها - والراحة، وازاى الرجل يعامل راجل.. بيشوف. تقول لهم فى الفصيلة: اللي عنده مشكلة بيجي لقائد الفصيلة يقول له: أمى تعبانة، أبويه حاجزين عليه؛ كل دى مشاكل موجودة فى العمليات. ضابط الفصيلة بيبليغ لغاية مايتوصل هذه العملية؛ يمكن توصل فى الحال الى وزير الحربية، وهم عاملين مكتب فى وزارة الحربية لحل هذه المشاكل. كل هذه المشاكل إحنا بنشوفها وبنحلها.. اللي عنده أبوه عيان، اللي عنده أمه عيانة؛ كل دى عمليات بنشوفها ونقدر نحلها، مش عاوزين العسكري يبقى موجود هنا فى الميدان وعقله ورا. بالنسبة للضابط، مش عاوزين أيضاً الضابط يبقى هنا فى الميدان وعقله ورا.

الحقيقة ده الضابط والعسكري هنا زى فرقة المطافى، نفضل قاعدين سنة واثنين وثلاثة وعشرة مفيش حاجة.. يعنى قاعدين وناس بتاخذ امتيازات، أما بتقوم الحريقة بيطلع بابور المطافى ليطفى الحريقة وبعدين يرجع. فاحنا النهارده كقوات مسلحة الحقيقة هذا هو ظرفنا لغاية ما نزيل آثار العدوان؛ علينا إن احنا نتحمل المشاق، المعيشة الصعبة، كل حاجة لغاية ما نحقق الواجب اللي ألقته البلد على عاتقنا. كل واحد يفكر فى الواجب، كل واحد يفكر فى بلده، كل واحد يفكر فى المستقبل، كل واحد يفكر فى إخواته ومصيرهم وأولاده ومصيرهم، كل واحد بيحس إن هذا قدره، وهو وصل هذا السن ألقى على عاتقه مسؤولية تحرير وطنه من عدوان واحتلال اسرائيل، وعليه أن يقوم بهذا الواجب. قد يستشهد وقد ينجح وينتصر، والواحد فى الحرب - زى ما قلنا - كتبت علينا.. إحنا مانحبش الحرب.. كتب عليكم القتال وهو كره لكم، وده موضوع خارج عن إرادتنا.. كتب علينا؛ فليس لنا وليس أمامنا من سبيل إلا أن نقاتل

حتى نستطيع إن احنا نرفع رؤوسنا فى بيوتنا وفى بلدنا وفى وسط العالم العربى وأمام العالم كله؛ لأن بعد ٦٧.. بعد يونيو ٦٧ إحنا راسنا مش مرفوعة كبلد وكأفراد كما كانت فى الماضى.

كل واحد الحقيقة مسؤول إنه يضحى بشئ كبير جدا من العمليات الشخصية والعمليات الفردية؛ لأن كل ساعة ستبدل فى العمل ستظهر نتيجتها فى الحرب. إذا تعبنا جدا فى التدريب.. إذا تعبنا جدا فى الفترة التى تسبق العبور الى الضفة الشرقية للقنال، سيكون العبور أسهل.. كل ما نتعب فى التدريب وكل ما نتعب فى العمل دلوقتى سيكون عبورنا أسهل، وحتكون الحرب بالنسبة لينا أسهل.

بالنسبة للتنظيم، بالنسبة لتكوين القوات، بالنسبة لكل هذه الأمور القيادة العسكرية تنظر فى كل هذه الأمور، ولن ندخل المعركة - قد نصبر مدة أطول - لن ندخل المعركة إلا بعد أن نستكمل كل قواتنا. لكن بدى أقول حاجة: إحنا بنستكمل وأيضا اليهود بيستكملوا، إحنا بنزود وأيضا اليهود بيزودوا.

بعدين اللى أنا بدى أقوله: لغاية دلوقتى اليهود عندهم قوات مدربة أكثر من قواتنا المدربة؛ لأن كل الرجالة وكل النساء فى اسرائيل مدربين.. الراجل بيخدم ٣٠ شهر، الست بتخدم ٢٠ شهر.. كل الرجالة والنساء معتبرين أفراد فى الجيش الاحتياطى. لن تكون المعركة سهلة.. حتكون معركة صعبة، ولكن إحنا دائما ومن تاريخنا دخلنا فى معارك أصعب من هذه المعارك، وانتصرنا بعون الله طالما هناك قضية؛ وتوجد قضية التحرير، قضية الوطن العربى، قضية فلسطين، وطالما يوجد الإيمان.. ونحن شعب يؤمن بالله ويؤمن بوطنه ويؤمن بحقه فى الحياة الحرة الكريمة.

البلد دلوقتى بقت بتاعة كل واحد من أبنائها.. والبلد بتاعتكم كلكم مبعثش بتاعة بشوات ولا بتاعة الملاك، وإحنا لازلنا نسير رغم كل هذا فى مراحل التحويل، بحيث تكون هناك العدالة الاجتماعية، وفى هذا القوات المسلحة هى أيضا فى الطليعة بالنسبة لحماية كل هذه الأهداف وكل هذه المكاسب.

وأخيرا أقول لكم: بقى لنا عشرين شهر، وأن الأوان إن احنا نصمم على أن نبدأ معاركنا، قد نبدأ بدفاع نشط. السكون الطويل اللى قعدناه لازم الحقيقة ينتهى، إحنا بقى لنا عشرين شهر ساكتين عشان الأول مكنش عندنا حاجة، دلوقتى جينا أسلحة وبقى عندنا أسلحة، وبقى عندنا عدد كبير من الفرق، وبقى عندنا دبابات أكثر من اللى عندنا فى الأول، بنجيب طائرات وجاية لنا طائرات، بعد كده.. بعد هذا علينا إن احنا نتجه الى تحرير أرضنا.. وربنا يوفقكم فى تحقيق هذا الهدف الكبير اللى كل البلد تنتظر اليكم لتحقيقه.

والسلام عليكم ورحمة الله.

و- كلمة عبد الناصر فى الفرقة ١٨ مشاه

فبراير ١٩٦٩

كل سنة وأنتم طبيين..

السنة الجاية إنشاء الله تكونوا فى البر الشرقى.. كنا هنا فى البر الغربى، الناس طبعاً مستتبه منكم حاجات كثيرة جداً. على كل حال يعنى إحنا أخذنا الوقت اللى فات فى إن احنا بنينا نفسنا وعوضنا، الوقت اللى جاى علينا إن احنا نستخدمه من حيث إن احنا نتفوق فى كل النواحي على العدو المواجه لنا. وفى كل وقت لازم نفكر وأن نتذكر - زى ما الناس كلها ما هى مفكرة - إن اسرائيل تحتل أراضى عربية، وإن واجب القوات المسلحة دائماً هو تحرير هذه الأرض. وإن كنا فى معركة سنة ١٩٦٧ هُزمتنا مش معنى هذا إن احنا أقل قيمة، ولكن ناس كثير هُزمتوا قبل كده، واستطاعوا بالعزيمة والتصميم إنهم بينوا نفسهم ويعوضوا هذه الهزائم.

العشرين شهر اللى فانت انقضت فى تعويض الحاجات اللى احنا فقديناها وفى التدريب، علينا إن احنا فى الفترة اللى جاية لازم نبذل أكبر جهد ممكن؛ لأن أنا أعتقد أن الوقت المحدد للتحرير لابد إنه يكون أزف. بعد ما قعدنا عشرين شهر.. من نوفمبر سنة ١٩٦٧، ونحن قبلنا الحل السلمى على أساس إنه يكون حل سلمى مشرف، ولم يكن هناك أمل كبير فى نجاح هذا الحل السلمى، ولكن قبولنا للحل السلمى لا يمنع بأى حال استعدادنا من أجل استرداد الأرض بالقوة.

وبعدين فى الأيام القادمة سنسمع أيضاً عن الحل السلمى، وعن كلام كثير عن الحل السلمى، وعن اجتماعات الدول الأربعة، ولكن من الواضح أن الولايات المتحدة الأمريكية تؤيد اسرائيل تأييد كامل، وطبعاً هذا ما يشجع اسرائيل. وطبعاً امداد الولايات المتحدة الأمريكية لاسرائيل بالطائرات بعد العدوان وبعد احتلال الأرض العربية؛ معناه أن الولايات المتحدة الأمريكية تؤيد اسرائيل فى الاحتفاظ بهذه الأرض المحتلة. هم وصلتهم طائرات وهتوصلهم أيضاً طائرات، إحنا حصلنا على كميات كبيرة من الأسلحة، وعوضنا كل الأسلحة اللى فقديناها، وحصلنا على الجزء الأكبر من الاتحاد السوفيتى، ولسه هنعصل على أنواع مختلفة من الأسلحة وأنواع حديثة من الأسلحة الحديثة.

أهلاً وسهلاً بإخواننا السودانين.. كل سنة وأنتم طبيين. إحنا مشينا فى الحل السلمى من الأول من نوفمبر سنة ١٩٦٧ وانتهاء ٦٧ و ٦٨ وبقينا فى ٦٩. واسرائيل ترفض رفض بات الحل السلمى بالشكل المفروض، وتعتبر أن الحل السلمى هو أن نخضع لمطالبها وأن نسلم.

فيه حاجة بدى أقولها لكم: إن احنا لن نسلم بأى حال من الأحوال، وهذا الشعب اللى رفض الهزيمة فى وقت اللى كنا فيه فى الحقيقة فى أسوأ أوقاتنا، لا يمكن بأى حال من الأحوال أن يسلم. وعلى هذا فالكلام اللى احنا قلناه دائماً: إن ما أخذ بالقوة لا يسترد بغير القوة هو يجب أن يكون شعار بناعنا. معنى هذا أن إذا لم نسترد حقنا بالحل السياسى فلا بد أن نسترده بالقوة، مانقدرش نصبر الى الأبد. وبعدين بعد ما صبرنا عشرين شهر، بيكون كده من الواضح أن الفترة الباقية على العمل من أجل تحرير الأرض فترة قليلة.. فترة محدودة. كلنا هنا موجودين للدفاع والصمود، ولكن لابد أن ننتقل من مرحلة الدفاع

النشط، ولا بد أن ننقل بعد هذا الى مرحلة الهجوم، ولا بد أن نعبر القناة ولا بد أن نحارب اسرائيل فعلا وجها لوجه.

في سنة ٦٧ الحقيقة قواتنا لم تواجه اسرائيليين.. الموجودين هنا منكم واشتركوا في المعارك ماشافوش اليهود في أي معركة من المعارك؛ لأن الحرب حصلت يوم ٥ وحصلت معارك يوم ٥ في رفح والعريش، وبعدين الانسحاب صدرت به أوامر يوم ٦، والخسائر اللي حصلت في القوات المسلحة كلها تقريبا أو أعظمها حصلت أثناء الإنسحاب. إذاً لا يمكن لنا إن احنا نعطي للعدو بأى شكل من الأشكال أكثر من قيمته، ولكن لازم نفهم أن أمامنا عدو مدرب.. عدو يتقن استخدام السلاح، والحرب ليست حصول على أسلحة.. إحنا حصلنا على أسلحة، وهنحصل على أسلحة؛ الحرب بيحددها العامل البشرى اللي هو التدريب، وروح القتال، والعلاقة بين الضابط والعسكري والقيادة؛ من قيادة الجيش وقيادة القوات الى قيادة الفصيلة وقيادة الجماعة. وإذا أردنا أن ننتصر - ولا بد أن ننتصر في المعركة القادمة - فلا بد أن نتفوق على عدونا في النواحي المختلفة.

عدونا دروس مستفادة أخذناها.. عارفين إيه نقطة الضعف اللي حصلت، وإحنا من جهتنا بنحاول بكل الوسائل إن احنا نحصل على كل ما تحتاج اليه القوات المسلحة من أسلحة، وأظن حصلنا في وقت قليل على كميات من الأسلحة، ولا زلنا نعمل على أن نحصل على أحدث الأسلحة وأحدث التدريبات. على هذا الأساس لا بد إن احنا نتفوق على عدونا في النواحي البشرية المختلفة لأن أخيرا سيلتقى الإنسان بالإنسان، والقدرة البشرية هي اللي تستطيع أن تقرر مصير المعارك القادمة؛ ستكون بالنسبة لنا معارك مصير، والمعارك القادمة ستكون بالنسبة لنا معارك حاسمة، ويمكن مش بالنسبة لتاريخنا بس بالنسبة لمستقبل الأمة العربية كلها، مش برضة لسنة أو اتنين ولكن لعشرات السنين؛ كل هذه المسؤولية تلقى على عاتق كل فرد.

العسكري العربي كان دائما عسكري شجاع.. وأنا حاربت معاه، وفي هذا لا يمكن لأى شخص إنه ينكر عليه شجاعته وإقدامه، وعلينا فعلا أن نثبت هذه الروح، ونثبت الروح القوية بالنسبة للشجاعة والإقدام بالنسبة لكل عسكري وبالنسبة لكل ضابط. وبعد كده كل واحد منا يعلم أن عليه واجبه ألقتة عليه البلد، بل ألقتة عليه الأمة العربية كلها؛ لأن احنا في هذا الوقت نعمل وتتطلع اليها الأمة العربية كلها، بل يمكن العالم كله يتطلع اليها.. كل الناس الشرفاء في هذا العالم.. الى كفاحنا والى نضالنا، وبننتظروا منا إن احنا نعمل.

كلنا موجودين الحقيقة ممثلين عن الضباط وممثلين عن صف الضباط والجنود في الوحدات، الحاجة اللي بدى أقولها لكم: إن أنا غير متفائل أبدا بالحل السلمى، ومن أول يوم لم نكن متفائلين بالحل السلمى؛ لأن اسرائيل لا يمكن بأى حال إنها تقبل إنها تتسحب إلا اذا استسلمنا وخضعنا، ويساندها في هذا الاستعمار العالمى. إذاً المعركة محتمة.. بعد شهر أو اتنين أو ثلاثة أو سنة، لكن لا بد فيه معركة. هذه المعركة الحقيقة إنتم اللي هتقروها.. كل واحد فيكم هو حيكون العصب من أعصاب هذه المعركة.

على هذا الأساس لا بد أن نعمل، وعلى هذا الأساس لا بد أن نجهز أنفسنا، وفي نفس الوقت لا بد أن نشعر ونحس أن عدونا أيضا مش ساكت.. عدونا بيدرب بلده كلها - الرجال والنساء - كل واحد بيدرب، كل واحد بيحمل السلاح، وليست المعركة هي معركة سهلة ولكنها ستكون معركة صعبة، على قدر ما نجهز أنفسنا لهذه المعركة على قدر ما تكون إمكانيات النصر قريبة.

طبعاً لا يمكن المعركة القادمة إنها تكون معركة أيام محدودة ولكنها ستكون معركة طويلة، ولكن إحنا نفترق عن عدونا فى القضية دلوقتى لأنه يحتل أرضنا فى مصر وفى سوريا وفى الأردن، وواجبنا إن احنا نحرر أرضنا، وواجبكم - أنتم القوات المسلحة - الحقيقة إنكم تعوضوا ما فاتكم فى سنة ١٩٦٧. والحقيقة الوقت اللي احنا فيه هو الوقت اللي البلد تحتاج فيه الى قواتها المسلحة؛ لأن ممكن إن القوات المسلحة تقعد سنة وانتين وعشرة ويمكن ١٥ و ٢٠ ماتكونش فيه حرب، ولكن إحنا النهارده احتلت قطعة كبيرة من أرضنا، وبهذا الحرب كتبت علينا والقتال كتب علينا، ولا بد لنا أن نحارب من أجل تحرير البلد. وحينما قبلنا الحل السلمى كنا نعتقد أننا يجب ألا نحارب من أجل الحرب، إذا كان من الممكن أن نصل بالحل السلمى الى جلاء اسرائيل عن كل شبر من الأرض العربية المحتلة بما فى ذلك القدس. ولكن من الواضح أن اسرائيل ترفض وسترفض باستمرار وتريد أن تتوسع وتحتل أجزاء من الأراضى العربية، بل إن موشيه دايان قال فى إحدى التصريحات: إن سيناء ليست لها أى جذور تاريخية ولا جغرافية ولا علاقة بمصر؛ وعلى هذا الأساس فلا حاجة لمصر بأن تعود الى سيناء لأن سيناء هى صحراء جرداء! الى هذا الحد والى هذا المدى وصل التحدى.. وإحنا بنصبر، وصبرنا ٢٠ شهر.

وضعنا فى الأول كان تعبان.. ما كانش عندنا حاجة خالص، النهارده حالنا أحسن بكثير قوى من الأول، وبكره حالنا هيكون أحسن. ولكن أعود وأكرر مرة أخرى من تتبعى لكل الحوادث السياسية والدولية.. أن المعركة آتية لا ريب فيها، وده موضوع لازم كل واحد بالنسبة لحياتنا وبالنسبة لمستقبلنا وبالنسبة لعمرنا وبالنسبة للموت.. الى آخر هذا الموضوع؛ إن أنا بانصحكم.. أنا كنت باحارب زيكم، وأنا كنت يوزياشى "نقيب"، والحقيقة اللي ساعدنى فى هذا إن أنا ماكنتش أفكر أبدا فى هذا الموضوع، والموضوع ده مهما الواحد فكر فيه مايقدرش يوصل فيه الى نتيجة. هذا الموضوع موضوع بتاع رينا، ماحدش عارف اللي بيحارب واللى هيعدى القناة واللى حيوصل الى العريش ممكن يعيش. وأنا أعرف واحد انجليزى حارب الحرب العالمية الثانية من أولها لآخرها إسمه دينس هاميلتون - وهو النهارده رئيس تحرير صانداى تايمز، وكان ضابط فى الجيش البريطانى - حارب فى كل حتة، وكان فى كتيبة مشاه.. كلكم عارفين الكتيبة المشاه هى اللي بتدخل فى الأول، وقعد لغاية ما انتهت الحرب وماجرش له حاجة.

واحنا عارفين فى سنة ٤٨ يمكن ناس ماتقدمتش وماقتحمتش وقاعدة ورا وجت لها قبلة، فأنا أنصحكم ما حدش يفكر، وتقولوا لإخوانكم إن هذا الموضوع ماحدش فينا يفكر فيه؛ لأن هو الحقيقة الفرق بين الشجاعة وعدمها إن الواحد بيفكر فى هذا الموضوع أو لا يفكر. فترك هذا الموضوع.. الواحد اللي مكتوب له يعيش ١٠٠ سنة هيعيش ١٠٠ سنة، واللى مكتوب له ويموت النهارده ويموت النهارده ولو إتزحلق على أى تبة يقع على حطة طوبة.

فاليهود ماكانوش أشجع منا.. مهماش أشجع منا سنة ٤٨ رغم إن احنا ماكسبناش ٤٨، وإنتم فيكم صغيرين وببسمعوا إن احنا ماكسبناش ٤٨. كل المعارك اللي احنا دخلناها فى ٤٨ مواجهة مع اسرائيل كسبناها. طبعاً المشكلة إن هم جابوا دبابات وطائرات وأسلحة، وإحنا فى هذا الوقت ماكانش عندنا. كان الجيش كله لا دبابات ولا طائرات ولا أسلحة، بل بالعكس اتعمل علينا منع، بل الذخيرة ماكانتش متوفرة لينا. النهارده بقى كل الأسلحة الحقيقة اللي احنا عايزنها موجودة. فالموضوع هو الضابط وشجاعة الضابط، إقدام الضابط، قيادته للعسكرى فى المعركة؛ بهذا نستطيع بإذن الله إن احنا ننتصر فى

المعركة القادمة. وبعد ما استثنينا ٢٠ شهر مش هنقدر نستنى مدة طويلة على هذا الشكل.. والبلد كلها
بتبص لكم، ويتبص لنا أيضا لكى نحقق هدفها فى تحرير الأرض.

كل سنة وأنتم طيبين.. وأرجوا من الله إنه يوفقكم.. يوفق قواتنا المسلحة فى أداء الواجب وفى
تحقيق الأمل.

والسلام عليكم.



عبد الناصر مع جنود القوات المسلحة على الجبهة ١٩٦٨/٢/٢٨

ز - كلمة عبد الناصر فى الفرقة ٢١ مدرعة

فبراير ١٩٦٩

كل سنة وأنتم طيبين..

إنتم كلكم مدرعات.. الفرقة ٢١، بقالنا عشرين شهر بعد العدوان والمعركة اللى احنا خسناها. اليهود بيشتغلوا من سنين، وكل واحد فيهم.. من الشعب اليهودى عارف هدفه، وعارف عايزين إيه.. هايعملوا إيه السنة دى والسنة اللى جاية والسنة اللى بعدها. وبعدين البلد كلها عندهم مجندينها لأن عددهم قليل.

بعد عشرين شهر لازم الحقيقة نكون حفظنا الدروس اللى فاتت طبعاً، وإحنا فى يونيو سنة ٦٧ مكانش عندنا فرصة لمعركة؛ لأن نتيجة للمباغثة اللى احنا خدناها بالنسبة للطيران، هم أصبحت عندهم فرصة فى المعركة. ولكن زى هم مايباخذوا باستمرار دروس لازم إحنا ناخذ الدروس أكثر؛ لأن هم باستمرار بيهددونا ولهم أطماع فى أرضنا، ولهم أطماع فى الأمة العربية.

النهارده الكلام اللى بنقدر نقوله إن مفيش حل سلمى.. كل الكلام عن الحل السلمى هو كلام لغاية دلوقت، واحنا من أول يوم متصورين إن مفيش حل سلمى، وأنا لما جيت هنا السنة اللى فاتت ولما جيت فى العيد والقوات اللى قابلتها قلت لهم: إن المعركة - وقلت لكم - إن المعركة جاية، ولكن إمتى هتيجى المعركة؟ لازم نستعد ولازم نجيب المعدات اللى احنا محتاجين لها، ولازم ندرّب، ولازم نكون على مستوى عالى من المهارة علشان نقدر ندخل المعركة؛ بدون كده منقدرش ندخل المعركة. النهارده الحقيقة بالنسبة للقوات المسلحة لازم كل واحد يبخط فى دماغه إن مفيش حاجة إسمها حل سلمى. الكلام اللى بينكتب فى الجرائد عن الحل السلمى واجتماع الدول الكبرى، كل ده لن تكون له أى نتيجة لسبب بسيط؛ لازالت أمريكا تؤيد إسرائيل ولن تقبل أمريكا أى شئ لا ترضى به إسرائيل، وإسرائيل لن ترضى إلا إن احنا نسلم تسليم كامل، وإحنا لا يمكن أن نسلم تسليم كامل؛ يبقى إذا لازم حندخل المعركة.

بعد ٢٠ شهر، ومنقدرش نتأخر مدة أطول من كده، يعنى بنقعد عدد من الأشهر لكن منقدرش نقعد كمان سنين؛ لأن علينا واجب وعندنا أرض محتلة فلازم حنحارب، لازم حنعبر القنال، لازم حنعدى الى البر الشرقى، ولازم حنحارب فى سبيل استرداد الأرض المحتلة بتاعتنا. ده قدرنا، وهذا ما كتب علينا وليس أمامنا من شئ فى أن نغير هذا، وأنتم كقوات مسلحة عليكم هذا الواجب. إحنا علينا نجيب لكم المدرعات والدبابات والجرارات والجنزير والطائرات.. الى آخر هذا الموضوع، ولكن كل ده لن يؤدى لوحده.. الدبابة مش حنحارب لوحدها!

اليهود كتبوا عن الحرب اللى فاتت.. وكتبوا عن كل حاجة بالتفصيل، وهم يمكن اعتبروا أن هذه الحرب حتكون آخر حرب وأنهم كسيوها، على هذا الأساس حيقدرنا يفرضوا شروطهم، علينا إن احنا نستسلم؛ هم كسيوا الحرب لكن إحنا مااستسلمناش. النهارده وضعنا أحسن من السنة اللى فاتت.. يعنى لما جينا فى العيد السنة اللى فاتت كان وضعنا أسوأ من النهارده؛ فنحمد الله إن احنا قدرنا نصمد لغاية دلوقتى.

فاليهود كتبوا الحقيقة عن الحرب اللى فاتت بالتفصيل.. عملية بعملية ومعركة بمعركة، وهذا الكلام - اللى قطعاً ضباط قرأوه وأنا قرأت هذا الكلام - اللى باين إن اليهود بيعتوا بالحجرات الصغيرة؛ بالدبابة

والعسكري والمدفعى اللى فى الدبابة، وإنهم قالوا: إن المدفعى بتاع الدبابة بتاعتهم من أول طلقة بيضرب الدبابة بتاعتنا. قطعاً فيه ناس منكم كانوا موجودين فى هذه المعركة وقالوا إن احنا كنا بنضرب طلفات ومابتجيش فى الدبابة. وبهذا الشكل لن نستطيع إن احنا نكسب المعركة، لازم الطلقة تكون بدبابة؛ لأن هو النهارده بيدرب ناسه على أساس إن كل واحد فيهم بيكون على كفاءة عالية من التدريب بحيث من أول طلقة بيضرب الدبابة، ويقول: عندهم قناصة بيحببهم فى الأول ويحطوهم علشان يضرولنا الدبابات. فى نفس الوقت قالوا: إنهم فى جبل لبنى لما شافوا عدد من الدبابات جاية لهم - جبل لبنى مصرية - إنهم أصيبوا بذعر، ولكن بعد كده فى ضرب النار هم كانوا ضرب نارهم مؤثر أكثر من ضرب نارنا! إذاً العملية الأساسية على الطيران.. يكون عندنا طيران. طبعاً اليهود هيكون عندهم طيران، ماحدش هايقدر يخلص على التانى فى هذه العملية؛ يبقى لازم العملية.. المدفعى بتاع الدبابة مش العملية تكتيك بس، العملية ضرب نار.. يضرِب أول طلقة ياخذ بيها الدبابة.. هو اللى بيقدر يكسب المعركة.

العملية الثانية بالنسبة للمدركات - يعنى برضه باقولها لكم - إن هم يعنى الضابط مبيقفلش عليه البرج، فى المعركة واقف.. تقاليد اليهود الضابط قائد الكتيبة وقائد اللواء واقف فى وسط المعركة، مايقفلش عليه برج الدبابة. وهم بيفتخروا.. بيقولوا: دى تقاليدنا، فإذا لازم إحنا أيضاً كمدركات نعمل تقاليد لنا، وعندنا الدبابة ت ٥٥ أحسن دبابة فى العالم، عندنا الدبابة ٥٤ وعندنا عدد كبير من هذه الدبابات، عندنا غير الدبابات الـ ٣٤ عندنا تسع ألوية. إذاً عندنا قوة دبابات وحجيب دبابات، بس الدبابة بقى يعنى مهما عملناها متحاربش لوحدها.. لازم الضابط ولازم العسكرى.

ده الحقيقة الواجب علينا.. وحنارب بعد عدة شهور.. وحنارب وحنعدى القتال، ولازم نحرر بلدنا. لازم من النهارده بنتعب فى التدريب.. نتمرن، ماحدش يزور فى ضرب النار، واللى حيزور حينضرب فى المعركة، اللى كتيبته تطلع صفر يجى يقول: إن كتيبتى صفر، عايز ذخيرة تانية وأضرب وإلا هاتطلع هناك اليهود حيزربوك! كل واحد.. كل ضابط.. كل قائد كتيبة.. كل قائد لواء يحط فى رأسه إن احنا الحرب جاية بعد كام شهر، ولازم حنعدى القتال؛ يابنحر القتال يابنموت.. ماحدش حيرجع تانى غرب القتال أبداً.

الموضوع اللى هو الحقيقة اللى أنا عايز أقوله لكم النهارده، ولا تصدقوش الكلام اللى حيطلع فى الجرائد عن إن فيه حل سلمى؛ لأننا من أول يوم - وأهو موجود الفريق فوزى - وأنا قائل له إن مفيش حل سلمى.. أو عوا تشتغلوا على حل سلمى. قايله كل ده، إحنا بنقول حل سلمى وإحنا بنقول فى الجرائد عايزين حل سلمى، إحنا مش عايزين حرب فى سبيل الحرب، ولكن بنقول لغاية ما نستعد.. لغاية ما نجهز نفسنا. لكن اليهود لن يرضوا.. بيقوا عُبُط إذا رضوا يسيبوا لنا أراضينا تانى بعد النصر الكبير اللى أخذوه سنة ٦٧! أنا لو مطرحهم ماسييش الأرض دية وأمشى.. لو أنا مطرحهم ماسييهاش، أسيبها إزاي؟! دى معركة ودخلت فيها وماكنتش أحلم أننى أصل الى مانع مائى بهذا الشكل.. وصلت، ماكانش يحلم إنه يصل الى نهر الأردن ووصل؛ فايبيها إزاي؟! إلا اذا استسلمت إستسلام اللى هو.. عايز اعتراف وعلاقات دبلوماسية وعلاقات تجارية وكل العمليات اللى هم بيقولوها. ولا يمكن الحقيقة إن احنا نقبل هذا الكلام؛ لأن اذا قبلنا هذا الكلام يبقى معناها إن احنا انتهينا الى الأبد.. ولا واحد بعد كده، ونحل القوات المسلحة.. مايفيش لازمة للقوات المسلحة. وإنتم.. حتى لو قبلنا هذا الكلام متقدروش تلبسوا بدلکم دية وتنزلوا تقابلوا الناس، والعسكرى اللى بيروح بلده يعايروه فى بلده وبيقولوا يعنى اللى حصل!

بعدين الحقيقة العسكرية اليهودى مهواش العسكرية الشجاع اللى هو متعلم على الهجوم، لكن إذا حد وقف له، وإذا حد هاجمه هو يعنى بنى آدم.. يعنى فيه كل الخواص البشرية؛ بيموت وبيتعور وبيهرب وبيجربى. وإحنا سنة ٤٨.. وأنا فى سنة ٤٨ كنت فى الحرب وشفته بعساكرى - عساكر فلاحين - وازاى العسكرية كان ما بيهجم علينا ومانمشيش، لازم نعمل هجوم مضاد ولازم نخلص عليهم. فى كل مرة كنا بنخلص عليه يطلع يجرى! وهو ده العسكرية اليهودى. هم بيحاولوا النهارده حرب نفسية؛ بيقلوا لنا: إن إحنا فى سنة ٦٧ جرينا، إحنا فى سنة ٦٧ ماجريناش.. إحنا صدر لنا أمر انسحاب فى سنة ٦٧؛ يعنى هو ده الموضوع اللى حصل.. يوم ٦ - تانى يوم - صدر أمر الانسحاب نتيجة تدمير الطيران.

انضربنا فى الانسحاب.. انضربت القوات المسلحة فى الانسحاب، وكان ممكن الانسحاب يكون أحسن من كده. الحقيقة كان ممكن ننسحب بالليل ونقف بالنهار لو انسحبنا على وقت أكثر؛ لكن ماواجهناش اليهود وجها لوجه. لكن هم فى المعارك اللى واجهونا فيها وجها لوجه، وبيقولوا إن هم تدريبهم كانوا أحسن وبيهزأوا بينا فى كل الكتب فى الحقيقة، بيهزأوا فى التدريب ويعنى يقولوا: إن دبابات جات علينا، ولكن بيقولوا جم بجرأة وتصدوا لينا ووقفوا فى جبل لبنى بس الدبابة المصرية تضرب المدفع مايبصبش، الدبابة اليهودية تضرب بتضيع دبابة! وهم قالوا: إنهم أول ما شافوا الدبابات - اللى هيه دبابات ٥٥ - ذعروا واعتبروا إنهم راحوا، لكن بعد كده قدروا يتغلبوا على قواتنا.

ولهذا علشان يعنى نكسب المعركة بإذن الله، لايد إن إحنا نموت نفسنا فى التدريب، ونرفع روح القتال، ونربط بين كل الوحدة.. الضابط والعسكرى، وإزاى الدنيا كلها تقدر تتعاون مع بعض، ونحط فى دماغنا إن إحنا مفيش قدامنا مفر الا إن إحنا حنارب تانى. وأما الاستسلام.. مفيش، اللى مش عايز يحارب يقول إنه مش عايز يحارب؛ يعنى سواء عسكرى أو ضابط أو أى حد، وأنا مستعد أخليه يروح. لازم الواحد يكون مؤمن بقضيته.. مؤمن ومايفكرش فى حاجة؛ لا فى نفسه ولا فى بيته ولا فى عمره.. العمر ده محدش عارف عمره ده أد إيه.. حد فيكم عارف إمتى حيموت؟ يمكن إحنا دلوقت هنا لو جت طائرة وضربتنا قنبلة محدش عارف يحصل إيه. وشفنا فى الحرب يمكن اللى قعد ورا بتتنزل قنبلة هاون.. واللى خايف يطلع قدام يموت.. واللى طلع قدام واقتحم مجرالوش حاجة.

عملية العمر ده والكلام ده موضوع إحنا ملناش دعوه بيه، بعدين العمر حتى من ناحية الفلوس اللى عنده أولاد والكلام ده؛ أهو الواحد أما بيموت بيعول همه أولاده.. يمكن الدولة تعمل له معاشات بالنسبة لأولاده، بعد كده ما يمكن اللى حيموت.. اللى مكتوب له إنه يموت إذا مامتش فى الحرب حدوسه عربية أو يتزحلق على قشرة موز يقع على نفوخه ويتكسر. يعنى ده موضوع إذا حد يفكر فيه الحقيقة يبقى يفكر فى عملية خارج قدرته، ويفكر فى بلادنا وفى إسمننا وفى سمعتنا وفى شرفنا. وإذا اليهود إحنا ماضرينهمش حيعدوا القتال، وبيجوا هنا يضربونا ويأخذوا أرضنا وأهلنا وكل شئ الحقيقة. ده الموقف اللى إحنا لازم نقابله السنة دى ولازم نحله السنة دى.. ومنقدرش بعد ما قعدنا عشرين شهر.. منقدرش نقعد أكثر من كده.

جميع المعدات إحنا حنجيبها.. معدات العبور، بالنسبة للقوات الجوية إحنا جئنا طيارات بكميات كبيرة، جاى لنا طيارين، ولن تبدأ المعركة إلا إذا كان عندنا قوة جوية على الأقل تعادل القوة اليهودية. وبالنسبة لقواتنا، إحنا متفوقين عن القوات الاسرائيلية. النهارده إن هوو عنده عدة جبهات على الأقل حيسيب حاجة. دلوقتى سوريا عندها بتزود؛ كان عندها ٣ فرق عملوا ٥ فرق، دلوقت عندهم قوة طيران كبيرة فيقدروا يحجزوا جزء كبير من اليهود. فإحنا الحقيقة لا نضخم فى حجم عدونا، وفى نفس الوقت لا نقلل

فيه، فى نفس الوقت نندرب ونجهز نفسنا ونقول الحكمة القديمة المعروفة.. إذا تعبنا جدا فى التدريب المعركة قدامنا حتكون معركة سهلة، إذا تكاسلنا دلوقتى فحتبقى المعركة معركة صعبة، كل ما نتعب فى التدريب كل ما خسايرنا فى المعركة حتكون خسائر أقل. والنقطة الأساسية إن بلدكم كلها النهارده تحط ثقته فىكم، وبعدين أنتم لكم تار مع اسرائيل علشان تقدرؤا ترفعؤا رأسكم فى البلد، اذا ماخذتوش هذا التار محدش فىكم - ولا إحنا ولا أنا يعنى - حنقدر نرفع راسنا فى هذه البلد.

الحقيقة إحنا بندى الأفضلية الأولى للفلوس للقمح ولل سلاح؛ دى العملة الصعبة اللى هى غير الحاجات اللى احنا بنجيبها من الاتحاد السوفيتى. الحاجات اللى بنجيبها من الاتحاد السوفيتى مايندفعش فيها فلوس، حنبقى ندفع فيها فلوس بعدين؛ يعنى واخذينها كلها كقروض. اللى مش قادرين نجيبها من الاتحاد السوفيتى بندى الأفضلية للعملة الصعبة للقمح ولل قوات المسلحة؛ لأن احنا عارفين إن احنا لايد حيجى يوم وحندخل فيه المعركة. الحقيقة - كقوات مسلحة - ماخذش بي فكر فى شىء.. محدش.. إلا هذا الموضوع.

بالنسبة بقى لمشاكلكم الخاصة والحاجات دى، يعنى أنا النهارده اتفقت مع الفريق يعمل لإدارة للمشاكل الخاصة للضباط والعساكر، وأنا مستعد كل واحد فىكم.. كل واحد فى القوات المسلحة عنده مشكلة خاصة أنا بلها له، وأنا قادر أن أحل أى مشكلة من هذه المشاكل فى أى ناحية من النواحي. ماخذش فىكم يفكر إلا فى العملية اللى احنا فيها.. وبنعمل فى الجيش وفى الفرق وحتى فى اللواءات والكتائب إدارات للمشاكل الخاصة بالعساكر اللى عندهم مشاكل؛ اللى أبوه تعبان، اللى عنده مش فاهم إيه.. كل ده يمكن نلحه مفيش حاجة منقدرش منحلهاش كلها، اللى عنده حد عيان نبعت له حد يشوفه.. كل ده ممكن. بالنسبة للضباط اللى عندهم أى مشكلة خاصة.. مشكلة من المشاكل بنقدر نلها. المهم تبعتولى هذه المشاكل؛ تيجى من الكتائب الى الألوية الى الفرق الى الجيش وبتجيبنى، وأنا باعمل عند محمد أحمد.. بيعمل عنده إدارة لحل هذه المشاكل، ويعنى إحنا أى مشكلة فى خلال ١٥ يوم - يعنى كل المشاكل اللى تحيلنا فى خلال ١٥ يوم - كلها بنكون حليناها، ومحدش يفكر فىكم إلا فى المعركة والاستعداد للمعركة.

وبعدين حنعدى شرق القنال.. محدش حيرجع غرب القنال تانى أبدا.. كل اللى حيروح شرق القنال مفيش رجوع خالص بأى شكل؛ يعنى مفيش انسحاب.. يعنى يانضرب اليهود يانخلص هناك فى شرق القناة. هو ده حقيقة الموقف اللى حيقابلنا، وحنيجى يوم بعد شهرين ثلاثة حيقولوا لنا: إن المحادثات اللى بين الدول الرباعية انتهت. إحنا عارفين إنها مش حتجيب نتيجة؛ لأن الأمريكان واخذين الموقف فى جانب اسرائيل. مش حنقدر طبعاً نستنى أكثر من كده؛ إحنا فى يونيه بقى لنا سنتين وحنبقى دخلنا فى السنة الثالثة، إذا لازم علينا إن احنا فى سنة ٦٩.. لازم نخلص هذا الواجب بإذن الله، والبلد بينتظر من القوات المسلحة كل ده.

بعد مانحرر سيناء إن شاء الله.. اللى عايز اجازة ٦ أشهر أبقى أديله اجازة ٦ أشهر، ونسرح اللى نسرحه، واللى عايز ياخذ اجازة سنة أديله اجازة سنة بس نرجع فى البلد ونبقى رافعين عيننا، رافعين رأسنا.

ولازم الضباط الحقيقة يقرأؤا اللى حصل فى الحرب والكتب اللى طلعت فى الحرب، لو الأجزاء الخاصة بالمدركات - ولو يمكن فيها كلام ضدنا - هم مبالغين طبعاً فى الحط من قيمتها؛ فمنتأثرش من هذا الكلام، الواحد بيشفوف إيه الكلام المعقول ونستفيد من هذا الكلام.. إيه العملية اللى تفيدنا.

الحقيقة إن البلد بتحط على عاتقكم.. أنا لما بقول البلد معنى هذا الحقيقة أولادكم اللي ممكن اللي هم لو ماكسبناش هذه المعركة ماحدث فيهم حيقدر يرفع رأسه ل ١٠٠ سنة في المستقبل، وإحنا الحقيقة مسؤولين إن احنا نرفع رأس البلد دي بعد اللي اتعمل فينا في سنة ٦٧.. وربنا يوفقكم جميعا وأشكركم.

والسلام عليكم ورحمة الله وبركاته.



د- كلمة عبد الناصر في فرقة ٨ م / ط

فبراير ١٩٦٩

الكلام اللي في الجرايد عن الحل السلمى والمفاوضات واجتماعات الدول الكبرى وحل الأمور حل سلمى؛ كل هذا لا نبغيه مطلقا. العشرين شهر اللي فاتم إحنا اتكلمنا عن قبول قرار مجلس الأمن.. اتكلمنا على الحل السلمى، وأنا بادی أحاديث صحفية وحدى.. أحاديث صحفية فى المستقبل عن الحل السلمى والتعايش.. الى آخر هذا الكلام، ولكن لن نحصل على حل سلمى مشرف لأن اسرائيل بعد انتصارها فى معركة ٦٧ تريد أن تحقق هدفها فى الصلح اللي بيه تفرض شروطها. وهذا لا يمشى مع كلامنا اللي بنقول فيه: حل سلمى مشرف.

الكلام اللي بيتقال عن مباحثات الدول الأربعة الكبرى كلام لن تكون له نتيجة، ولو إن احنا من الناحية الدبلوماسية بنتمشى معاه؛ لأن أمريكا لازال رأيها إن أى حل يجب أن يكون بموافقة الأطراف المعنية.. يعنى موافقة اسرائيل، الحل اللي متوافقش عليه لن ينفذ.

إذاً بنرجع تانى لكلامنا وينقول: ما أخذ بالقوة لا يسترد بغير القوة، بعدين قدامنا عمل شاق بعد معركة ٦٧. خرجنا من هذه المعركة، فقدنا جزءا كبيرا وأعظم جزء من أسلحتنا.. سلاح طيراننا كله، واستطعنا أن نعوض الجزء الكبير من أسلحتنا. ونحن منذ أول دقيقة كنا نعلم أن إعادة تسليح القوات المسلحة، وإعادة تدريب القوات المسلحة يحتاج منا الى وقت، وكنا نعلم أن اسرائيل بعد أن انتصرت فى المعركة العسكرية تريد أن تفرض ارادتها، وكنا نعلم أن لا مجال هناك بأى حال من الأحوال لأى حل سلمى، ولكن رغم هذا قبلنا الحل السلمى لعدة أسباب.. نحن لا نريد الحرب من أجل الحرب، فإذا كان هناك حل سلمى مشرف يعيد الينا أرضنا ولا نتنازل عن أى شبر من أراضينا.. يبقى كان بها، وفى نفس الوقت نستعد فى قواتنا المسلحة. اسرائيل استعدت قبل ٦٧ ورتبت نفسها فى كل مجال من العسكرى لغاية القوات الجوية. إحنا النهارده الموضوع مهواش سلاح.. نحن نحصل على الأسلحة، ونحاول بكل الوسائل إن احنا نحصل على ما نريد من الأسلحة، وما نريد من طيران وما نريد من وسائل الدفاع، ولكن أنا بقول لكم النهارده كلام اللي قلته: إن مفيش حل سلمى.. عشان تعرفوا إن المعركة.. لا بد من المعركة.

هذا الكلام ماباقولوش فى الجرايد ومش حقه فى الصحف، وهذا الكلام مش حعلنه. وبعدين النهارده بعد عشرين شهر.. صبرنا عشرين شهر.. إذاً آن الأوان إن احنا ننقل من مرحلة الإعداد ومرحلة التدريب الى مرحلة الدفاع النشط، ننقل بعد هذا الى مرحلة التعرض والهجوم لنعبر الى الضفة الشرقية ونحرر الأرض المحتلة. اليهود بيقولوا: حيثفظوا بصحراء سينا.. دايان بيقول: إن مصر ليست لها حقوق تاريخية ولا جغرافية فى صحراء سينا، وبيقول: إنهم حيثفظوا بالقدس، وبيقولوا: إنهم حيثفظوا بأجزاء من الضفة الغربية وهضبة الجولان!

مش ده طبعا الحل السلمى، والحل السلمى اللي احنا كنا نقصده هو أن نستعيد الأرض.. كل الأرض. فباقول لكم النهارده: كتب علينا القتال.. ربنا قال كتب عليكم القتال وهو كره لكم. المعركة معركتنا من أجل تحرير بلدنا ومن أجل الأمة العربية؛ لنا قضية.. لنا هدف، وبعدين قدامنا عدو شرس تسانده قوى الاستعمار العالمى. إذاً العملية مش عملية الدبابة ولا هى عملية الطائرة ولا هى عملية المدفع؛

العملية أساسا منحصرة في أهداف أساسية هي مواضيع بشرية - البشر - اللى يكون أحسن هو اللى يكسب في المعركة.. هذا بالنسبة للتدريب.

بالنسبة للتدريب، من الواجب علينا أن ندرب قواتنا رغم مشاكل التدريب ورغم الصعوبات. الوحدة اللى بتتدرب كويس وتتعب النهارده حتستريح في المعركة.. المعركة الحتمية، الوحدة اللى تتدرب النهارده تستطيع أن تحقق النصر العسكرى. اللى بيتدرب.. اللى هو العسكرى اللى بالبندقية أو بالرشاش وبالمضاد للدبابات، هو العسكرى اللى يحقق النصر في المعركة العسكرية، المدفجى اللى في الدبابة اللى لازم يصيب الدبابة للعدو من أول طلقة. اليهود في المعركة اللى فاتت كتبوا إن هما كانت دباباتهم بتصيب دباباتنا من أول طلقة، وإن احنا كنا بنضرب عدد من الطلقات؛ إذا لازم أول طلقة من الدبابة.. أول طلقة من المدفع المضاد للدبابات، لازم يضرب.. لازم يصيب.

النقطة الثانية اللى هي قبل ما نحقق النصر.. روح القتال وروح التحمل. قدامنا هذه المعركة.. إذا انتصرنا فيها بإذن الله، بعد كده يبقى قدامنا وقت طويل جدا عشان نستريح، وعلشان نقعد مع أولادنا، علشان نقعد مع عائلتنا.. الى آخر هذا الكلام. النهارده بعد سنتين حنقابل يوم ٥ يونيو.. الناس حيسألوكم: أنتم القوات المسلحة بقى لكم سنتين عملتم إيه؟ حيسألونى أنا: بعد سنتين عملنا إيه؟ إذ من الواضح إن السنة دى اللى احنا فيها قبل ما تنتهى لازم نكون عدينا الضفة الشرقية وحررنا الأرض.

كل الكلام اللى بيتقال عن الحل السلمى هو كلام عشان ناخذ الفرصة لنستعيد استعدادنا ونستعيد تسليحنا، ولكن لا بد من المعركة.. المعركة حتمية. لا اسرائيل تقبل بدون المعركة إنها تنتازل عن الأرض اللى احتلتها، لأن اسرائيل تريد التوسع، وتريد أيضا اذلال الشعب العربى في كل بلد عربى، واذلال الأمة العربية.

إحنا النهارده حالنا أحسن بكثير من السنة اللى فاتت؛ بعد العدوان مكش عندنا قوات للدفاع. النهارده إنتم عارفين عندنا قوات.. تحتاج هذه القوات الى بعض حاجات حنجبها لها لتكون خفيفة الحركة، نحتاج تفوق جوى.. نحن نعمل على أن يكون هناك التفوق الجوى، ونعمل أيضا على أن تكون قواتنا خفيفة الحركة.

إحنا الحقيقة الفلوس اللى عندنا فلوس محدودة، فبناخد فلوس من الدول العربية - الكويت والسعودية وليبيا - علشان تعوض لنا ما فقدناه من غلق قناة السويس، وده كان قرارات الخرطوم، وده كان قرار كبير ساعدنا على الصمود، ولكن تسليح قواتنا المسلحة يقع على عاتقنا؛ فيه جزء بناخده بالقسط من الاتحاد السوفيتى، وفيه جزء الحقيقة مستعدين ندفعه بالعمل الصعبة، وهذا لا نتأخر فيه بأى حال من الأحوال.

إذا إحنا بنحول قواتنا الجوية ليكون لها التفوق بالذات من ناحية الطيارين ومن ناحية الطائرات. الطيارين بيزيدوا دلوقتى كل شهر، الطائرات كثير، ويوم ما يكون عندنا التعادل الجوى أو التفوق الجوى، إذا لن يكون لنا عوض إن احنا نتأخر ٢٤ ساعة. على هذا الأساس كل واحد من أبناء القوات المسلحة يحط في تفكيره تفكير واحد وهو أن المعركة حتمية، ولايخضع بما يكتب في الجرائد عن كلام الدول الكبرى أو عن الحل السلمى أو عن مجلس الأمن. كل هذه الأمور إحنا ماشيين فيها إذا نجحت كان بها، إذا منجحتش يبقى ليس أمامنا إلا الحل العسكرى.. المعركة التى يخوضها كل فرد من أبناء هذا الوطن ومن أبناء الأمة العربية.

وبدى أقول: بعد ما استتينا عشرين شهر ومنقدرش نستنى مدة أطول من هذا؛ وعلى هذا فالمعركة آتية فى هذا العام حتى نحرر الأرض العربية، وهذه المعركة هى معركة قواتكم. وإحنا بنستعد وأيضاً إسرائيل بتستعد؛ تحصل على أسلحة.. تحصل على طيارات، تحصل على دبابات، الاستعمار العالمى بيديها الأموال ويديها الأسلحة، ولكن رغم هذا ولا بد أن نستعد لهذه المعركة، وكل ما يمكن ما فى طاقتنا.. وهذا ما سنعمل فيه.

هذه هى رسالة قواتنا المسلحة.. وهذه هى رسالتكم، وهذا هو الأمل الذى تضعه الأمة العربية والوطن واخواتكم فى الوطن على عائقكم، وعليكم أن تتحملوا التعب والمشقة والتضحية فى سبيل تحرير الوطن وفى سبيل تحرير الأرض.

هذا ما كتب لنا، وعلينا أن نقوم به بشهامة ورجولة، والعسكرى المصرى هو دائماً يتسم بالشهامة والرجولة، والجندى العربى كان دائماً متفوق فى سنة ٤٨ رغم إن احنا ماكسبناش حرب ٤٨، ولكن الجندى العربى - وأنا كنت موجود فى حرب ٤٨ - كان وهو متلاحم مع الضابط يتفوق فى أى معركة ضد الجندى المعتدى الاسرائيلى. لا يمكن لنا أن نهون فى قوة عدونا، ولكن يجب أن نضع قوته فى محلها، ويجب أن نستعد لهزيمة هذه القوة المعتدية التى احتلت الأرض العربية.

وببارككم الله والله يوفقكم.



ط - كلمة عبد الناصر فى القاعدة الجوية ببليبس

فبراير ١٩٦٩

كل سنة وأنتم طيبين..

بعد عشرين شهر النهارده من العدوان ومن ٥ يونيو ٦٧، المرحلة اللى فاتت بذلنا كل الجهود علشان نعوض اللى فاتتنا؛ علشان نبني القوات المسلحة بالنسبة لكم، علشان نبني قوات جوية قادرة إنها تتصدى للقوات الجوية المعادية.. القوات الجوية الاسرائيلية. نتكلم عن الحل السلمى.. نتكلم عن قرار مجلس الأمن، ولكن اللى باين والأكيد إن اسرائيل ترفض تنفيذ قرار مجلس الأمن وترفض الحل السلمى.. اسرائيل عايزه إننا نسلم. إحنا يوم ٩ يونيو ماكنش عندنا ولا طيارة من طائرتنا.. راحت كلها، قواتنا المسلحة راحت كلها وانهزمتنا، ولكن الشعب مارضيش أبدا إنه يسلم. فإذا موضوع التسليم ده موضوع ماهوش موجود أبدا فى تفكيرنا.. العملية هى عملية مصير وعملية حياة أو موت.

بعد ٢٠ شهر بعد قرار نوفمبر ٦٧، اسرائيل من الواضح إنها عايزه الأرض وعايزه التوسع. قالوا: إن سيناء لا تمت الى مصر تاريخيا ولا جغرافيا؛ ولذلك لا حق لنا فى العودة الى سيناء، ولا داعى إن احنا نستعيد سيناء على أساس أن سيناء منطقة صحراوية جرداء لا فائدة لنا فيها. ده كلام قاله دايان، قال كلام كثير جدا عن ضم القدس وعن ضم الضفة الغربية.

عندنا النهارده موقف بعد ٢٠ شهر من العدوان ومحادثات الدول الكبرى، فى رأى محادثات الدول الكبرى مش هتصل الى سلام ولا حل مشرف؛ لأن أمريكا تشترط إن اسرائيل تقبل أى حل، واسرائيل لن تقبل إلا بالحل اللى هى عايزاه؛ اللى هو الحل اللى يفرض علينا الاستسلام.

النهارده من الواضح بعد ٢٠ شهر إن مفيش سبيل أمامنا فى المستقبل القريب إلا إن احنا نحارب فى سبيل استعادة أرضنا، يكون عندنا الهدف والعقيدة بتاعتنا؛ كلنا ناس مؤمنين بالله، وكلنا ناس مؤمنين بالوطن.. طبعاً الناس اللى مش مؤمنين مالمهمش محل بيننا أبدا بأى شكل من الأشكال. الواحد النهارده بعد اللى حصل فى يونيو ٦٧ علينا أن نبذل كل شئ فى سبيل استعادة الأرض اللى خسرتها فى يونيو ٦٧، وعلينا إن احنا نستعد على أساس أن المعركة معركة محتومة مفروضة علينا؛ لأن بعد أن تقتل حتى محادثات الدول الكبرى نكون مطالبين إن احنا نعمل شئ.

إحنا منتظرين القوات الجوية.. عليها دور أساسى بالنسبة للمعركة.. القوات الجوية عليها دور كبير. وإحنا فى سبيل هذا حصلنا على ما يمكن الحصول عليه بكل الوسائل وأكثر من الممكن الحصول عليه. كلكم تعرفوا إن احنا ما عندناش فلوس علشان نشترى، بنأخذ من الاتحاد السوفيتى.. مادفعناش فلوس.. كل الطائرات اللى أخذناها دي مادفعناش ولا أى جنيه.

كلكم تعرفوا إن الميج ٢١ فى فينتام ضربت الفانتوم، وأنا لما رحمت هناك فى الاتحاد السوفيتى فى شهر أغسطس وسبتمبر شفت الناس اللى هم مصممين الميج ٢١ والطيارين الإختبار، وقالوا لى: إنهم متأكدين إن ٢١ بتضرب الفانتوم والميراج. كنتم بتتكلموا عن المدى.. إتكلمنا على المدى قبل كده وقالوا: إنهم هيصالحوا هذا الموضوع. إذا احنا عندنا الناس، لكن عايزين يبقى عندنا قوات جوية متفوقة على القوات الجوية الاسرائيلية؛ ده لازم يكون هدف كل واحد، ده لازم يكون فى دماغ كل واحد من أول قائد

القوات الجوية لغاية الضابط الملازم والعسكري؛ فأنتم هيبكون عليكم العبء الكبير فى نجاح المعركة القادمة بإنشاء الله.

الحقيقة يعنى ما أقدرش أقول لغاية النهارده إن احنا عندنا قوات جوية قادرة قدرة كاملة.. ما أقدرش أقول بأى شكل من الأشكال. الحجة إنها مش هى الطائرات والقطع الغيار ولأ مش فاهم إيه - الكلام اللي إنتم بتقولوه والكلام اللي الواحد بيسمعه - مش هى دى أبدا.. مش الحجة. إحنا عايزين نخلق روح السلاح.. نخلق تقاليد فى السلاح، وبعدين أمامنا رسالة إن احنا أمامنا كذا شهر لازم نروح الشرق ولازم نستعيد الأرض بتاعتنا، وكل واحد مالهوش حاجة فى الدنيا إلا هذه الرسالة. بنأدى هذه الرسالة وبعد كده اللي عايز أى حاجة يعملها؛ لأن هو ده الوقت اللي بلدكم عايزاكم فيه. بعد كده يبقى الجيش أهو جيش فى وقت سلم، وكل واحد قاعد فى بيته.. قاعد مع أولاده. أما النهارده فيه رسالة أهم من البيت وأهم من الأولاد وأهم من العيله وأهم من القرية وأهم من المصالح الشخصية؛ إن احنا يبقى عندنا قوات جوية تضارع القوات الجوية الاسرائيلية.

اللى كتبوا على القوات الاسرائيلية الجوية كتبوا كلام كثير جدا، ويمكن عرفتم إنتم كل الكلام اللي انكتب على القوات الجوية الاسرائيلية. اللي كتبوا كلهم قالوا: إن اسرائيل فيها دفاع جوى ضعيف جدا.. وكل الكتب قالت إن فيها دفاع جوى ضعيف جدا. الناس اللي دخلوا المعارك الأخيرة أنا جيتهم عندى.. وجم عندى فى البيت وقالوا: إنهم بعد ما اتدربوا وقدروا يدخلوا المعركة وشافوا إزاي الطائرة بتشتغل.. يعنى أنا لما باعرف إن طائرة عملت حادثة بابات مغموم، لأن حوادث كثير! ليه حوادث كثير؟! ٩٠ حادثة السنة اللي فاتت والا ٩٥ حادثة، ليه؟! وبعدين الطائرة دى ما إحنا هندفع ثمنها.. الطائرة بكام بمليون والا باثنين مليون دولار. إحنا يعنى.. ولو احنا واخدين هذه الطائرات.. ويعنى عملنا المستحيل علشان نجيب هذه الطائرات. كلنا عارفين إن اليهود عندهم الميراج.. حوالى ٦٥، على المعدل اللي احنا بنشتغل به ده كان زمان الميراج خلصوا من عندهم فى الحوادث. أبص ألقى يومين طائرتين سوخوى اتسابوا ووقعوا، ويوم تانى طائرة ١٧، ويوم بعدها بأربع أيام طائرة ٢١، ليه؟! إيه العيب اللي فينا؟! إيه النقص اللي فينا؟! بعدين يعنى إحنا جينا خبراء.. وأنا طلبت الخبراء، وهم الروس ماكانوش عايزين يدوا الخبراء. إحنا فينا عيب ولازم نصلح العيب، وفيه ناس يعرفوا أحسن منا، ولازم نتعلم منهم لغاية ما نكسب المعركة، ونقبل كل كلمة وكل نصيحة.

نجيب منهم الطائرة وهم اللي عاملينها؛ عملوا لنا طائرة مخصوص اللي هى هتيجى لنا الشهر اللي جاى بناء على طلبنا. يعنى إحنا عملنا مصنع طائرات هنا وصرفنا فيه ٨٠ مليون جنية ماعملناش فيه ولا طائرة! هم عملوا لنا الطائرة بناء على طلبنا المخصوص، هنبدى نستلمها فى الشهر الجاي.. طائرة طويلة المدى. فالناس لازم نستفيد منهم، ونعرف منهم كل المعلومات المطلوبة؛ قطع القوات الجوية السوفيتية قوات جوية بتاعت دولة كبرى منظمة.

لازم قواتنا الجوية تكون أحسن من القوات الجوية الاسرائيلية، إزاي؟ أهو ده موضوع حقيقى لازم بيكون عملى، زى ما اشتغل وايزمان وزى ما اشتغل مردخاى هود إنتم بتشتغلوا هنا؛ وإنتم أقل.. أقل من وايزمان وأقل من مردخاى هود؟! متعلمين أقل منهم؟! عندكم الفرص، وعندكم كل اللي إنتم عايزينه.. عايزين عملة صعبة تجيبوا bowsers؟ برضه قلنا: اتفضلوا.. تجيبوا starters؟ قلنا: اتفضلوا، كل حاجة؛ أجهزة لاسلكى.. مش فاهم إيه.. مفيش حاجة إحنا مقصرين فيها، لكن لغاية دلوقتى مفيش قوات جوية الواحد يظمن إنها تقف قصد القوات الجوية الاسرائيلية اللي سمعنا عليها؛ بالنسبة لإزاي يطلع كام طلعة

فى الیوم، وبیشتغل كام عملیة. أنا الكلام ده باقوله لكم وبرضه تقولوه لإخوانكم، ویاقوله لقائد القوات الجویة.

النهارده بقلنا عشرين شهر.. وهستى أد إیه بعد كده؟ یعنى القوات المسلحة.. أنا جى من الفرقة المدرعة وعدیت على كل الفرق.. بنكمل، ولكن مستیین مانقدرش ندخل العمليات إلا اذا كان عندنا تعادل جوى أو تفوق جوى محلى.. مستیین الطیران.. مستیین الطیارات. برضة العملیة مهیاش طیارات، مهیاش معدات؛ العملیة أولا وأخیرا هی الانسان وهو البشر.. الرجل اللی ببینى بإدیة بلده، ویؤمن برسالة موجودة وعنده إیمان هو اللی هیشتغل. أنا ما بقولش الناحیة الفردیة إنكم جبناء.. أنا لا أقصد هذا أبدا.

فیه فرق بین العمل الفردى.. وقد تكونوا فى العمل الفردى من أحسن ناس، ولكن باقول عمل السلاح اللی هو القوات الجویة كقوات جویة.. إزای أشتغل زى القوات الجویة الاسرائیلیة ما اشتغلت فى یوم ٥ یونیو؟ فیه قوة جویة اشتغلت زى المكنة یوم ٥ یونیو، وقالوا: ما فیش.. ماشافوش من الحرب الثانیة.. أول قوة جویة یشفوها یقولوا أحسن قوة جویة فى العالم.. الكلام اللی قالوه! طبعا المعركة بالنسبة لهم كانت معركة بسیطة جدا.. معركة سهلة ماكانش فیه دفاع جوى مضبوط، وبعین قواتنا الجویة ما اشتغلتش إلا عملیات فردیة، بعین إزای كانت عملیات فردیة؟ مش هو ده اللی احنا عایزینة.. إحنا عایزین الحقیقة القوات الجویة تستعید وضعها كقوات جویة، وتأخذ وضعها الطبیعی كقوات جویة متماسكة فیه روح السلاح وفیه روح القتال وفیه روح الجماعة؛ بهذا الحقیقة نقدر نطمئن علشان ندخل معركة.

الی أنا برضه بدى أقوله ویاقوله لقائد القوات الجویة وقلته قبل كده لوزیر الحربیة: إن المعركة مفروضه علینا، ولا بد من معركة حتمیة، ولا بد إن احنا جمیعا - بالنسبة لقائد القوات الجویة والقادة المسؤولین وقادة الألویة وقادة الأسراب - یعرفوا إن العملیة مفروضه علینا فرضا، مش حانقدر أبدا.. مش حانقدر نهرب منها. وأنا لو لقیتم حل سلمى.. هو أسلم إن الواحد یقبل الحل السلمى، ولكن هناك فرق إن احنا نقبل حل سلمى مشرف، ویین أن یفرض علینا تنازلات اللی تكسر مناخرنا للأبد إحنا وأولادنا. ولا نستطیع الحقیقة بأى حال إن احنا نقبل أى شىء یکسر مناخرنا ویخلینا مطاطین الرأس. وبهذا لیس أمامنا مفر إلا إن احنا نرفض أى حل استسلامى، ولیس أمامنا بديل إلا إن احنا نقاتل، ووقت القتال طبعا إحنا اللی حنحده على أساس إن احنا نختار الوقت المناسب اللی یكون احنا استعیدنا فیه. لكن علشان الوقت المناسب ده بیجى لازم نبذل كل طاقتنا لکی نستعد، ولا نضیع دقیقة ولا ساعة فى شكل من الأشكال المختلفة. بنقل الوقت من.. هم بیقولوا إنهم هم بیملوا فى ٨ دقائق، وأنا باسأل هنا بیقولوا بنملى أو بنجهز فى نصف ساعة، هل هم كدابین ولا احنا مش قادرین؟! إن كان هما بیملوا فى ٨ دقائق إحنا لیه مانملاش فى ٧ دقائق؟! اذا كنتم عایزین معدات أنا مستعد أجیب كل المعدات علشان هذا الموضوع.

وأنا قلت للحنایى: كل حاجة عایزینها أنا مستعد أجیبها. اذا كانوا هم بیشتغلوا فى ٨ دقائق بیقى إحنا لازم نشغل فى ٧ دقائق، هم مش أحسن مننا أبدا.. هم مش عنصر أحسن مننا.. یعنى مفروض إنهم مش متعلمین أحسن مننا. العملیة الحقیقیة التدریب، العملیة إن احنا نحافظ على نفسنا ویكون فیه نظام، یعنى هو الحوادث الكثیرة تدل على إن فیه عیب.. فیه خلل موجود فى القوات الجویة. طبعا لما واحد بیموت.. لما مات الضابط بتاع الطیارة ١٧.. طبعا واحد أنا معرفهوش لكن واحد عندى مات طیار، مات لیه؟! لیه یموت؟! یعنى الواحد بیسأل هذا السؤال. واشمعنى الیهود.. بتحصل عندهم حوادث

بهذا الشكل؟ أبداً. ليه إحنا بتحصل عندنا حوادث بهذا الشكل؟! هل إحنا غير قادرين إن احنا نمنع كل أسباب هذه الحوادث؟! أهو أنا باقول هو دى ماهياش عملية الطيار لوحده ولكن العملية عملية السلاح.. هو السلاح - القوات الجوية - هي اللي بتقدر تنظم العملية وتضبط العمليات.

الحقيقة كقوات جوية عليكم مسؤولية كبيرة جدا جدا أمام البلد، أمام القوات المسلحة على أساس أن القوات المسلحة اذا كانت هتجهز هتستاكم لغاية ما أنتم تجهزوا. قد تكونوا في حاجة الى طيارين والطيارين جايين، في حاجة الى طيارات والطيارات جاية؛ جى من الشهر الجاي طيارات معدلة لكن عندنا أيضا طيارات ومعدات، ولكن أيضا فقدنا طيارات كثيرة جدا في الحوادث!

الحقيقة أنا جيت زرتكم السنة اللي فاتت يمكن في الشهر التاني في أنشاص، والواحد كان شايف الدنيا، سنة فاتت.. أرجوا إن السنة دى نكون استفدنا فيها ونكون اتعلمنا فيها. بعدين الحقيقة النهارده مش معقول تمر سنة تانية ونيجى في العيد اللي جاي ونقول الكلام اللي احنا قلناه دلوقتى. الكلام اللي قلناه السنة اللي فاتت في أنشاص.. العملية بالنسبة لنا عملية حياة أو موت وعملية إيمان - زى ما قلت - إيمان برينا وإيمان بالوطن، وعلى هذا الأساس الحقيقة ماقدمناش عملية تاني، عملية بقى مصير.. الواحد هي على أد ما نعتنى على قواتنا الجوية ونضبطها على أد ما نضمن السلامة، وبعد كده الباقي ده موضوع بتاع ربنا، والواحد لما بيدخل معركة مايفكرش في حاجة.. بيفكر في إنه يطلع كسبان من هذه المعركة.

وأنا يعنى باقول هذا الكلام الحقيقة ما باقول هوش توبيخ ولا باقوله تقطيم لكم، ولكن أنا عايز أشوف قواتنا أحسن من قوات اسرائيل، نشوف قواتنا.. مثلا يعنى فيه ناس قالوا إحنا عايزين ميراج. بكل أسف إحنا الطيارات اللي بنجبها بنجبها بالقسط، واللى شفتم الآخر قالوا: إن ٢١ أحسن من الميراج. واحد قال لى: إنه ركب الميراج، والثاني قال لى كان موجود - قائد القوات الجوية - كل اللي اشتبكوا في المعارك واللى كانوا قبل كده بيتكلموا. المصمم السوفيتى قال لى: إنهم عاملين نموذج للميراج وعاملين نموذج للفانتوم، وإن ٢١ تضرب الميراج وتضرب الفانتوم. طبعا ٢١ مش هتضرب لوحدها.. يعنى مش هتضرب بالعقل الإلكتروني، يعنى هتضرب بالطيار.. هو هنا العملية كفاءة الطيار، والكفاءة دى هي بتيجي من بناء القوات الجوية.

فالوقت أمامنا قليل.. قعدنا ٢٠ شهر مش هانقدر نقعد طبعا هذه المدة والمعركة حتمية، ولا بد إن احنا ندخل المعركة لتحرير أرضنا في يوم من الأيام، ونرجوا إن هذا اليوم يكون يوم قريب. البلد كلها بتتظر لكم كقوات جوية على أساس إنكم إنتم حتكونوا الأساس في هذه العملية، القوات المسلحة أيضا النهارده وامبارح - أنا قاعد ماريت على كل الفرق - كلهم بيقولوا طبعا إن اللي حضر معركة ٥ يونيو مارحتش منهم خسائر في القتال، كل الخسائر راحت منهم في الانسحاب؛ لأن القوات الجوية المعادية هي اللي كانت مسيطرة على سماء المعركة. طبعا علشان ندخل معركة جديدة لازم قواتنا الجوية بتكون مبنية بناء سليم، وتستطيع فعلا إنها تأخذ التفوق.

بالنسبة للهدف الأساسى، هو العمل والعمل من أجل بناء قوات جوية، ومن أجل المهارة، ومن أجل روح الجماعة، ومن أجل روح القتال، ومن أجل تلافى الحوادث. طبعا يطلع من عملية التفيتش على الطيارة على الصيانة الى كل هذه العمليات، ماهياش عملية إن واحد يطلع يطير بالطيارة بس، وإنتم طبعا تعرفوا هذا الموضوع وأنا مش فنى معرفش هذه المواضيع. لازم نتقن كل هذه الأعمال أكثر من اسرائيل علشان نستطيع إن احنا نكسب المعركة القادمة بإذن الله.

إنشاء الله أشوفكم قبل المعركة.. أكون مطمئن إن احنا من ناحية القدرة بقينا أحسن من القوات الاسرائيلية، ولو إنهم هم إتدربوا وقت كثير، ولكن إنتم برضوا كنتم بتقولوا عندنا أكبر قوة ضاربة فى الشرق الأوسط. نجيب لكم طيارات، وندرب الطيارين.. خدنا ٥٠٠ طائرة، نبني قوات جوية، وعليكم إنتم بقى أن تبنيوا فعلا قوات جوية بتقاليدها وبروحها، وعليكم إنكم تعملوا قوات جوية متفوقة فى التوقيت على اسرائيل، وفى المهارة بالنسبة للعمل الجماعى وبالنسبة للعمل الفردى. وأتمنى من الله إنه يوفقكم فى تحمل هذه المسؤولية الكبيرة الملقاة على عاتق كل واحد منكم.. مسؤولية تجاه ربنا وتجاه بلدكم وتجاه الناس الللى بتبص للأرض المحتلة وتشعر إن فيه غمة كبيرة محطوة على قلبها.

كل سنة وأنتم طيبين.

والسلام عليكم.